

醫述卷十四 幼科集要

新安杏軒程文圃觀泉輯

小門人

鮑瑞鳴鳳岡校
鄭立傳受廷

綱領

經義

六歲以下為小。○吾不能察其幼小。○嬰兒病。其頭毛皆逆上者。必死。靈樞

總論

初生半週至兩歲為嬰兒。三四歲為孩兒。五六歲為小兒。七八歲為齠齯。九歲為童子。十歲為稚子。壽世保元



醫述卷十四

幼科集要目錄

綱領

初生

胎證

雜病



醫述卷十四 幼科集要

新安杏軒程文囿觀泉輯

小門人

鮑瑞鳴鳳岡校
鄭立傳受廷

綱領

經義

六歲以下為小。○吾不能察其幼小。○嬰兒病。其頭毛皆逆上者。必死。靈樞

總論

初生半週至兩歲為嬰兒。三四歲為孩兒。五六歲為小兒。七八歲為齠齯。九歲為童子。十歲為稚子。壽世保元



兒在母腹中。感受精氣。一月胚。二月胎。三月血脈見。四月形體成。五月能動。六月筋骨成。七月毛髮生。八月臟腑具。九月谷神入胃。十月百骸備而生。生後六十日。瞳子成。能笑語。始識人。百日任脈成。能反覆。一百八十日。尻骨成。能獨坐。二百一十日掌骨成。能匍匐。三百日。骨成。能獨立。三百六十日膝骨成。始能移步。○芽兒出腹。筋骨未斂。肌肉未成。如水上之泡。草頭之露。夫初生一臘之內。天地八風之邪。豈能遽害。良由在胎之時。母失愛護。或勞動氣血相干。或坐臥飢飽相犯。或酒肉冷熱相制。或驚恐血脈相亂。蘊毒於內。損傷胎元。降生之後。故有胎熱胎寒。胎肥胎怯。胎驚胎黃。諸病生焉。外因

或洗浴拭口。斷臍灸額之不得法。或緜抱驚恐。乳哺寒
溫之乖其宜。多致噤口臍風。鎖肚不乳等證。病至若此。
難以治療。良可憫也。千金方

或問。人之生也。與憂俱生。何處見得。予曰。落地一聲。但
聞哭。不聞笑。非憂而何。然則憂之一字。在嬰幼已先得
之。但憂之小者不爲患。其有喪父失母。悲哀憂慮而成
病者。有斷乳思慮而成病者。慄慄忽忽。心煩啼吵。不思
乳食。而內熱作者。是也。至於驚恐。小兒最多。在母胎時。
已先有之。喜則笑。怒則啼。惟喜怒哀無常。不能爲病耳。俗
謂小兒無七情。此謬談也。許宣治

有謂小兒易虛易實者。非也。柔脆不耐病痛。固理所當

然。然其氣水歸乎軀殼。病亦在於軀殼。無異於成人。未嘗易虛也。殆藥虛之耳。小兒生機勃如。無病則日以長大。病果無害。生機依然。故有似乎易實。然使其不病則長大。必有勝於既病者。是易實之說亦非也。小兒如嫩草木。尅伐不可。補亦不易。草木方萌芽時。失水則死。傷水亦死。惟頻頻澆灌。如其量而止爲宜。不特用藥。卽乳食皆當知節。○幼科謂小兒純陽。當用涼藥。非之者曰。是稚陽。非純陽也。宜補陰以配陽。夫旣曰稚陽。則陽亦不足可知。而偏於補陰。可乎。陰陽二氣。本無偏勝。小兒軀殼。氣水所貫。何異於成人。其所以異於成人者。特氣水未充。不能免於柔脆耳。是以治小兒難於成人。然亦

有易於成人者。以其未有人事之斲喪也。病在陽則治陽。病在陰則治陰。焉用純陽稚陽之紛紜哉。醫參

有謂小兒純陽之體。多宜清涼。此說尤誤。王節齋曰。小兒無補腎法。謂男至十六。而腎始充滿。既滿之後。妄用虧損。則可用藥補之。若受胎之時。稟之不足。則無可補。稟之原足。又何待補。嗚呼。此何說耶。夫小兒謂純陽者。以其陰氣未成。卽腎虛也。陰既不足。而不補之。陰絕則孤陽亦絕矣。殊不知錢氏六味丸。專治小兒。以其純陽無陰。故取八味丸。裁去桂附。獨補腎水。此義惟薛立齋得之。世醫多未悟也。張氏醫通

小兒之病。古謂啞科。以其言語不能通。病情不易測。故

曰寧治十男子。莫治一婦人。寧治十婦人。莫治一小兒。此甚言其難也。然以余較之。則三者之中。又以小兒爲最易。蓋小兒之病。非外感風寒。則內傷飲食。以至驚風吐瀉。及寒熱疳癩之類。不過數種。且其臟氣清靈。隨撥隨應。但能確得其本。則一藥可愈。非若男婦損傷。積痼癡頑者比。余故謂其易也。第人謂其難。謂其難辨也。余謂其易。謂其易治也。設或辨之不真。則誠難矣。然辨之之法。亦不過辨其表裏寒熱虛實。六者洞然。又何難之有。故凡外感者。必有表證。如發熱頭痛。拘急無汗。或因風搖擗之類。是也。內傷者。必有裏證。如吐瀉腹痛。脹滿驚疳積聚之類。是也。熱者必有熱證。如熱渴煩躁。秘結

癰瘍之類。是也。寒者必有寒證。如清冷吐瀉。無熱無煩。惡心喜熱之類。是也。凡此四者。卽表裏寒熱之證。極易辨也。然四者之中。尤惟虛實二字。最爲緊要。蓋有形色之虛實。有聲音之虛實。有脈息之虛實。如體質強盛。與柔弱者異也。形色紅赤。與青白者異也。聲音雄壯。與短怯者異也。脈息滑實。與虛細者異也。必內察脈候。外觀形氣。中審病情。而精察之。又何虛實之難辨哉。必其果有實邪。果有火證。則不得不爲治標。然治標之法。宜精簡輕銳。適病則已。毋犯正氣。但見虛象。便不可妄行攻擊。若見之不真。勿謂姑去其邪。諒亦無害。不知兒體柔嫩。氣血未堅。臟腑甚脆。略受傷戕。萎謝極易。近則爲目



下之害。遠則遺終身之羸。凡此實求本之道。誠幼科之肯綮也。○初生兒。以手捻其頭。摸其頤領。不作聲者。爲無病。以指探其口。雖發聲。而從容啞指者。其病輕。若卽發聲不啞指。面色青紅兼紫者。此落地受寒也。其病重。辨其形色虛實而治之。若牙緊不納乳。或硬而不軟。其病極重也。此驚邪入足太陽經。及足陽明經而然。須急治之。庶可平復。張景岳

心主驚。實則叫哭發熱。飲水而搐。虛則困臥而悸。心熱則合面睡。或上竄咬牙者。導赤散主之。心氣實而喜仰臥者。瀉心湯主之。○肝主風。實則面青目直。叫哭壯熱。項急頓悶。虛則咬牙呵欠。肝熱則手循衣領。及亂捻物。

瀉青丸主之。壯熱飲水喘悶。瀉白散主之。○肝有風則目連劄。得心熱則發搐。或筋脈牽繫而直視。用瀉青丸以治肝。導赤散以清心。肝熱則目赤。或兼青發搐者。亦用前二藥。風甚則身反張強直。用地黃丸以補腎。瀉青丸以治肝。○脾主困。實則身熱引飲。用瀉黃散。虛則吐瀉生風。用異功散。面白腹痛。口中氣冷。不思飲食。或吐清水。以益黃散溫補脾虛。呵欠多睡者。脾氣虛而欲發驚也。○肺主喘。實則悶亂氣急喘促飲水。虛則哽氣出氣。肺熱則手招眉目鼻面。用甘桔湯主之。肺盛復感風寒。則胸滿氣急喘嗽上氣。先用瀉白散以清肺氣。後用大青膏以散風寒。肺臟怯則脣白。用阿膠散補之。悶亂



氣粗。喘促。哽氣者難治。肺虛甚也。○腎主虛。若胎虛怯。神氣不足。目無睛光。面白顛解。此皆難育。雖育不壽。或目畏明下竄者。蓋骨重而身縮也。咬牙者。腎水虛而不能制心火也。皆用地黃丸。錢仲陽

小兒行遲齒遲解顛顛填顛陷五軟五硬鶴膝腎疳齒豁睛白等證。此皆稟受不足。治以六味丸加鹿茸。若因精未滿。而御女以通其精。多致頭眩作渴多痰。或發熱腰痠。或自汗盜汗。二便瀉痛。當用六味八味。及補中湯加減。無不奏效。薛立齋

嬰兒肌肉柔脆。不耐風寒。臟腑氣弱。乳汁難化。內外二因之病自多。然有非風寒竟致外感。不停滯已屬內傷。

其故何歟。嘗思人在氣交之中。春夏地氣之升。秋冬天
令之降。呼出吸入。與時消息。間有穢濁吸入。卽是三焦
受邪。過膜原直行中道。必發熱煩躁。幼醫但執表散消
導清火通便。病輕或有倖成。病重必然顛覆。錢仲陽云。
糞履不可近襁褓小兒。余言非無據矣。○小兒諸證。如
發熱無汗。煩躁昏譫之頃。或戰汗將止之時。或吐瀉之
後。或瘧厥漸甦。或便閉適解。或灌藥之後。正元氣與病
邪交戰之際。若能養得元氣一分。卽退一分病邪。此際
其兒必有昏睡懶言。氣怯神弱。身不轉動之狀。正當養
其元神。冀其邪退正復。乃病家父母。偏於此際。張惶驚
恐。因其不語。而呼之喚之。因其鼾睡。而頻叫醒之。因其



不動。而搖之拍之。或因微有昏譫。而必詳詰之。或急以湯飲進之。或屢問其痛痒。嘔嘔不已。使其無片刻安神。如此必輕變重。重變死矣。更有豪富之家。延醫數輩。問候多人。房中聚集。互談病情。夜則多燃燈燭照之。或對之哭泣。或信巫不信醫。舉家紛擾。此非愛之。實殺之也。試以大人之病情體之。抑好安然寂靜乎。抑好喧譁動擾乎。此理概可知也。臨證指南

察色

古稱望而知之謂之神。兒醫號爲啞科。脈來駛疾。指下難明。尤以察色爲要。故首敘之。察其面部五色。以知病源。人身五體。以頭爲首。首中有面。面中有睛。睛中有神。

神者。目中光彩是也。隱顯橫衝。應位而見。以應五藏。五色者。青黃赤白黑是也。五藏之色。心赤。肝青。脾黃。肺白。腎黑。五藏所主病證。蘊於內必形於外。故小兒有病。先觀其本位形色。以論五行生剋吉凶。形色若不相應。然後聽聲切脈。證治準繩

左腮屬肝。右腮屬肺。額屬心。鼻屬脾。頤屬腎。青主驚。紅主痰熱。黃主食積癥癖。白主泄瀉水穀。黑主腎氣受傷。

小兒直訣

望聞問切。固醫家之不可少一者也。在大方則然。而小兒惟以望爲主。問繼之。聞則次。而切則無矣。經云。切而知之。謂之巧。小兒脈體未全。切無可切。而巧亦無所用。



其巧。問而知之謂之工。小兒未言時。問之固無可問。卽能言時。問之多不以實對。是問不必問。而工亦無所用。其工。聞而知之謂之聖。小兒初病時。聲音或不失其常。至病久而氣喪聲失。聞無可聞。而聖又何見其聖乎。吾故以望爲主也。或曰。五藏之屬。體隱理微。望從何處。曰。體固隱矣。而發見於苗竅。顏色之間者。用無不周。理固微矣。而昭著於四大五官之外者。無一不顯。故病於內。必形於外。望形審竅。自知其病。舌乃心之苗。紅紫。心熱也。腫黑。心火極也。淡白。虛也。鼻準與牙牀。乃脾之竅。鼻紅燥。脾熱也。慘黃。脾敗也。牙牀紅腫。熱也。破爛。胃火也。脣亦脾之竅。紅紫。熱也。淡白。虛也。黑者。脾將絕也。口右

扯。肝風也。左扯。脾痰也。鼻孔。乃肺之竅。乾燥。熱也。流清涕。寒也。耳與齒。乃腎之竅。耳鳴。氣不和也。耳膿。腎熱也。齒如黃豆。腎氣絕也。目乃肝之竅。斜視而睛轉者。風也。直視而睛不轉者。肝氣將絕也。夏禹鑄

聽聲

聲以候元氣之厚薄。卽以審病苦之所在。所以古人有隔垣之治也。聲重者。傷風。聲壯者。實熱。聲悲者。藏燥。聲焦者。恐怖欲生風候。重濁者。腸胃有積。沈靜者。疝積無疑。但哭無啼者驚。多啼不哭者痛。聲輕頻嚶者風癘。聲緩無氣者吐瀉。聲嘶者。咳嗽喉痛。聲促急者。喘迫上氣。聲遲緩者。泄瀉腸鳴。諸如此類。皆可聽而知之者也。證

看小兒法。以聽聲爲先。察色爲次。凡聲音清亮者生。有回音者生。澁者病散而無出聲者不壽。忽然大聲而無病者。須細看其身。恐有瘡毒。泣不出聲者死。泣而無淚者死。張景岳

脈法

凡診小兒。旣其言語不通。尤當以脈爲主。參以形色聲音。則萬無一失矣。然小兒之脈。非比大人多端。但察其強弱緩急。是卽肯綮。蓋強弱可以見虛實。緩急可以見邪正。四者旣明。無論諸證。隨病合脈。左右逢源。所遇皆道矣。張景岳

小兒一歲後。可用一指轉側。辨其三部脈之弦急浮沈。四五歲後。脈七八至而細數者。爲平。九至者傷。十至者困。六至五至者。爲虛爲寒。弦緊爲風癘。弦急爲客忤。其變蒸者。脈必散亂。骨間有熱。脈則沉數。若浮而不調。爲鬼祟。浮大而數。爲風熱。伏結爲物聚。微細爲疳積。爲腹痛。浮而洪。爲有蟲。浮而遲。爲胃寒。此論脈之大要耳。又當參以三部五脈。三部者。乃看面上氣色。虎口脈紋。寸口一指脈。五脈者。上按額前。下診太衝。并前三部。謂之五脈。

薛鎧

帝曰。乳子而病熱。脈懸小者何如。岐伯曰。手足溫則生。寒則死。帝曰。乳子中風熱。喘鳴肩息者。脈何如。岐伯曰。

喘鳴肩息者。脈實大也。緩則生。急則死。此內經之旨。聖人立言。簡切而總括無餘。世人不悟。視爲汎常。能於此等處着眼。則診視之要。思過半矣。予之臨證診視。每論吉凶。則多中者。亦不外此。第意之所至。口莫能宣。竊詳經所謂大小緩急者。亦發而不露之意。蓋大。卽浮洪類也。小。卽沈細類也。急。卽數也。緩。卽遲也。何若竟易以浮沈遲數之爲得乎。再以節菴之有力無力。辨其表裏虛實。誠診視小兒天然不易之妙訣。陳飛霞

看指紋

小兒形體既具。經脈已全。便有脈息可辨。自水鏡訣。及全幼心鑑等書。有三歲以上。當察虎口。寅卯辰。風氣命。

三關之說。其中之可取者。惟曰脈從寅關起。不至卯關者。易治。若連卯關者。難治。若寅侵卯。卯侵過辰者。十不救一。只此數語。亦可用辨吉凶。至若紫爲風。紅爲寒。青爲驚。白爲疳。及青是四足驚。赤是水驚。黑是人驚。黃是雷驚之類。豈此一線之色。果能辨悉如此。最屬無稽。烏足憑也。張景岳

錢氏看小兒脈紋。男左女右。取決於虎口之次指。未有究其義者。予考之素靈。始悟。以其屬陽明脈之根始也。陽明之脈。起於大指次指之端。陽明多氣多血。有病則應之。小兒純陽之體。故卽於此以觀其變也。○小兒脈見虎口。亦猶大人脈見寸口也。三關直透者不治。怡堂散



幼科指紋。總無正論。有謂不必用者。有用而至於怪誕不經。誣民惑世者。是皆未明紋中之理。所以有用不用之殊議也。請以一得之愚。聊發其要。蓋此指紋。與寸關尺。實同一脈。按內經十二經絡。始於手太陰。其支者。從腕後出。次指之端。而交於手陽明。卽此指紋是也。明如景岳。猶謂此紋爲手陽明經絡。不知手太陰經。起於中府。而終於大拇之少商。手陽明經。起於食指之商陽。兩不相值。若無此旁支。交通營衛。不幾令太陰陽明表裏斷絕乎。况此脈可診。人所不知。其遲數代促。與太淵無異。但脈體差小耳。指紋之法。起於宋人錢仲陽。以食指

分爲三關。寅曰風關。卯曰氣關。辰曰命關。其訣謂風輕氣重命危。雖未必其言悉驗。而其義可取。蓋位則自下而上。邪則自淺而深。證則自輕而重。人皆可信。祇恨復出詭異之說。謬撰驚風門類。致後賢多歧亡羊。反成疑案。予意仲陽宋之明人。以孝見稱。豈肯妄言誤世。大抵後之俗子。假托其名而爲之。惟有識者。知其語言鄙俚。論證荒唐。便能棄置不用。如張景岳夏禹鑄輩。皆謂可不必用。蓋非不用。實惡其妄誕不經耳。近世醫家。不知真僞。習而行之。乃致惑世誣民。禍害嬰幼。夫醫事動關生命。乃聽無稽之言。流傳貽殃。是豈其可。予雖不敏。竊知診脈。每見幼科指紋之說。不勝髮豎。請言其要。蓋此



指紋。既太淵脈之旁支。則紋之變易。亦卽太淵之變易。不必別立異說。眩人心目。但當以浮沈分表裏。紅紫辨寒熱。淡滯定虛實。則用之不盡矣。倘舍此不圖。妄執僞說。臨證不察病原。謬指爲人驚畜驚。誑惑愚昧。予恐盲人翳馬。終墮重淵。莫之能出矣。幼幼集成

看眼

目分五藏。黑珠屬肝。白珠屬肺。色青。肝風侮肺也。淡黃。府有積滯也。老黃。肺受溼熱也。瞳人屬腎。無光彩。腎虛也。大角屬大腸。破爛。肺有風也。小角屬小腸。破爛。心有熱也。上胞屬脾。腫。則脾傷也。下胞屬胃。青色。胃有風也。睡而露睛者。脾胃虛極也。鐵鏡

小兒諸病。但見兩目無精光。黑睛無運轉。目睫無鋒芒。如魚眼之狀者。不治。或神藏於內。外若昏困者。無妨。其有病篤而眼中神氣不脫者。猶可治。眼者。臟腑神氣之所見。神氣已脫。脈雖僅存。亦未能保。壽世保元

目內赤者。心實熱。淡紅者。心虛熱。青者。肝實熱。淡青者。肝虛熱。黃者。脾實熱。白而混者。肺實熱。目無精光者。腎虛也。小兒直訣

驗顛顛

嬰孩週歲以前。須驗顛顛。與證兼看。則補瀉自得。吉凶易彰。訣曰。顛顛青筋。脈虛不榮。顛顛常陷。滑泄便便。顛顛腫起。風痰不止。顛顛久冷。吐瀉青青。顛顛虛軟。顛顛癩



不免。顛顛扁闊。暴泄易脫。顛顛歪斜。風作卽亡。顛顛連額。驚風易傷。顛顛未充。怕熱怕寒。顛顛緩收。胎氣不週。顛顛動數。神氣昏弱。顛顛寬大。受疾恐害。顛顛未合。筋骨柔弱。馮氏錦囊

相壽夭

小兒識悟過人者多夭。大則項橐顏回之流。小兒骨格成就威儀。迴轉遲舒。稍費人力雕琢者。壽。其預知人意。迴旋敏速者。亦夭。大卽楊修孔融之徒。由此觀之。壽夭大略可知也。千金方

頭者。諸陽之會。髓之海也。凡兒頭角豐隆。髓海足也。背者。五臟六腑俞竅皆附於背。脊背平滿。臟腑實也。腹者。

水穀之海。腹皮寬厚。水穀盈也。目爲肝竅。耳爲腎竅。鼻爲肺竅。口爲脾竅。七竅無闕。形象全矣。故知肉實者脾足。筋強者肝足。骨堅者腎足。不妄言笑者心足。不多啼哭者肺足。哭聲連續者肺實。不久眠睡者脾實。脚健而壯。項長而肥。囊小而黑者。根株固也。肌肉溫潤者。營衛和也。腮妍如桃。髮黑如漆者。表氣實也。小便清長。大便滋潤者。裏氣實也。已上皆爲壽相。其兒無病易養。○諸陽皆起於頭。顛破項軟者。陽衰於上也。諸陰皆起於足。臑小脚蹇者。陰衰於下也。鼻孔乾燥者肺枯。脣縮流涎者脾冷。髮稀者血衰。項軟者柱折。青紫之筋。散見於面者。多病風熱。形枯色灰者表虛。瀉利無時者裏虛。瘡疥

啼哭。及多笑語者。皆陽火妄動之候也。已上皆爲夭相。其兒多病難養。陳飛霞

驗二便

古人有以小兒瀉痢。糞黃饒臭。作胃熱論治。此大誤也。蓋飲食入胃。化而爲糞。則無有不黃。無有不臭者。豈得以黃臭概爲熱乎。今以大人之糞驗之。凡胃強糞實者。深黃蒼老。方是正色。若純黃不蒼。則胃中火力。便有不到之處。再若淡黃。則近白矣。近白則半黃之色也。糞色半黃。則穀食半化之色也。糞氣饒腥。則穀食半化之氣也。穀食半化。則胃中火力盛衰可知。若必待糞青糞白。氣味不臭。然後爲寒。則覺之遲矣。故但以糞色之淺深。

糞氣之微甚。便可別胃氣陽和之成色。智者見於未然。而况於顯然乎。再若小水之色。凡大便瀉痢者。清濁既不分。小水必不利。小水不利。其色必變。卽清者亦常有之。然黃者十居八九。此因瀉亡陰則氣不化。氣不化則水涸。水涸則色黃不清。使非有淋熱痛澀之證。而但以黃色便作火治者。亦大誤也。○小兒小便如米泔。或溺停少頃。變作泔濁者。此脾胃溼熱也。凡飲食不節者。多有此證。然亦有氣虛下陷而然者。若止見溺白。而別無煩熱脈證。則但節其生冷。及甘甜等物。不久自愈。不可因其溺白。而過用清利。多致傷脾。反生吐瀉等證。是皆誤治之害也。張景岳



小兒瀉出青色者。乃脾土受肝木剋制。而見本質。由其臟氣虛寒。故也。黃耆益黃散主之。得效方

護養

田婦護兒。絕無他疾。譬之樹木。生於深山大澤。容易合抱。至於異果奇材。縱加培養。每多不秀實者。豈貴賤異哉。數見風日。則血凝氣剛。肌肉堅固。堪耐風寒。以田舍兒較之相似。萬全方

小兒初生。肌膚未實。宜用舊絮護其背。不可太煖。更宜數見風日。則血氣剛強。肌肉緻密。若藏於重幃密室。則筋骨軟脆。不任風寒。多易致病。衣服當隨寒熱加減。但令背煖爲佳。亦勿多令出汗。恐表虛。風邪易傷。乳哺不

宜過飽。陳氏所謂忍三分寒。喫七分飽。頻揉肚。少洗澡。要肚煖頭涼。心胸涼。皆至論也。又須令乳母預慎六淫七情。厚味炙煇。則乳汁清和。兒不致疾。否則陰陽偏勝。血氣沸騰。乳汁敗壞。必生諸病。若屢用藥餌。則臟腑陰損。多變敗證。可不慎歟。保嬰撮要

俗云。若要小兒安。常帶三分飢與寒。言殊未當。夫欲其帶飢者。恐過飽傷脾。脾化不及。則未有不病。使飲食調勻。節其生冷。何病之有。奚必帶飢耶。欲防未然。使其略飢。猶庶幾也。至若寒之一字。則大有關係矣。經云。避風如避箭。嬰兒血氣未成。肌膚嫩薄。顧可令其帶寒耶。兒處腹中。裹護最密。胞胎初脫。極易感邪。收生遲慢。風寒



襲之。卽生驚風。多致不救。及其稍長。每多發熱。幼科不識。概呼變蒸。或寒傷臟爲吐瀉。或寒生熱爲驚疳。種種變生。多由外感。雖稟體強盛。不畏風寒者。亦所常有。但強少弱多。貧富異質。醫家不能察。嬰兒不能言。病家不能辨。徒付之命。誠可嘆也。張景岳

乳哺

小兒乳哺。須要得法。乳者。爛也。哺者。食也。乳後不得便與食。哺後不得便與乳。小兒脾胃怯弱。乳食相併。難以剋化。必成乳癖。腹痛作熱。疳病從此起也。湯氏

凡乳兒不可過飽。飽則溢而成嘔吐。若乳來猛。取出接後再乳。如母欲寐。當以臂枕兒。令乳與兒頭平。母欲睡

著時。卽奪其乳。恐填兒口鼻也。母熱乳兒令變黃。母怒乳子令變驚。母吐下乳子令虛羸。母醉乳子令身熱腹滿。○夏不去熱乳。令兒嘔吐。冬不去寒乳。令兒泄瀉。○夜間乳兒。母須起坐。抱兒餵之。○每早欲乳。皆須捏去宿乳。○乳汁勿投於地。蟲蟻食之。令乳無汁。可沃東壁上佳。千金方

巢元方
兒啼未定。氣息不調。不可乳飲。恐乳停胸膈爲嘔吐也。

小兒在胎之時。衝脈運血以養之。及其產下。衝脈載血以乳之。乳爲血化。所以兒之脾胃。獨與此乳汁相脗合。其他則皆非所宜矣。凡小兒一週二歲。止可飲之以乳。

不可鋪以穀食。蓋穀食有形之物。堅硬難消。兒之脾氣未強。不能運化。每多因食致病。倘乳少。必欲借穀食調養者。須以早米炒熟磨粉。微入白糖。滾湯調服。不致停滯。至於肉食。尤爲有害。幼幼集成

小兒四五歲當斷乳。而不肯斷者。宜用畫眉膏。斷乳之後。方可漸與肉食。則無疳癖之患。證治準繩

服藥

小兒氣血未充。而一生盛衰之基。全在幼時。此飲食之宜調。而藥餌尤當慎也。今世幼科。本無確見。凡遇一病。無論虛實寒熱。悉以散風消食。清痰降火。行滯利水之劑。通套混用。謬稱穩當。何其誕也。夫有是病。而用是藥。

則病受之。無是病而用是藥。則元氣受之。小兒元氣幾何。能無陰受其損。而變生不測耶。又有愛子者。因其瘦弱爲慮。詢之庸流。則不云痰火。必云食積。動以肥兒丸。保和丸。使之常服。不知肥兒丸。苦寒之品。最敗元陽。保和丸。消耗之物。極損胃氣。謂其肥兒。適足瘦兒。謂其保和。適足違和耳。卽如抱龍丸之類。亦不宜輕用。嘗見一富翁子。每多痰氣。或時驚叫。輒用此丸。一投卽愈。彼時以爲神丹。長則一無所知。豈非暗損元神所致耶。張景岳小兒勿輕服藥。藥性偏。易損萌兒之沖和。○小兒勿多服藥。多服耗散真氣。非質弱。則識愚也。○小兒變蒸。可勿服藥。變蒸乃古人鑿空之談。實無此理。○小兒初生



七日。可勿服藥。初出母胎。元氣太和。宜全其真。汪廣期
時下幼科。常用金藥。不論內傷外感。一見小兒發熱。輒
與服之。以爲驚可預散。不知發熱自有多端。退熱亦有
多法。設非實在驚證。則引賊入門。纏綿不解。變證蜂作。
又以爲藥力尚輕。更服利驚丹。牛黃紫雪等劑。速其死
亡。自有幼科以來。未有斯藥之弊之甚也。尤可駭者。習
俗移人。病家無論何證。醫不以此藥與之。卽加嗔怪。竟
視爲尋常服餌之方。悲哉。慈幼筏

乳下嬰兒有病。必調其母。母病子病。母安子安。兒難服
藥。當令其母服之。藥從乳傳。其效便捷。保嬰撮要

附方

肥兒丸 治食積五疳。

黃連

蕪荑

神麴

麥芽

等分爲末。糊丸桐子大。每服一二十九。白湯下。

利驚丸 治急驚。

輕粉

青黛各一錢

牽牛五錢

天竺黃二錢

蜜丸小豆大。薄荷湯化下。

抱龍丸

膽星四兩

天竺黃一兩

雄黃

硃砂各半兩

麝香一錢

甘草膏丸。皂莢子大。溫水化下。百日。一丸分三四次服。



畫眉膏

山梔三箇

雄黃

硃砂等分

輕粉少許

共爲細末。麻油調勻。候兒睡着。濃抹兩眉。醒來便不
思乳。



初生

斷臍

凡結束所留臍帶。大約六寸。長則傷肌。又斷臍不可用
刀割。蓋鐵器寒冷。恐傷生氣。只須隔單衣咬斷後。將煖
氣呵七口。庶無內弔之疾。千金方

斷臍若用剪刀。須先置於懷中令煖。寶鑑

拭口

小兒初生。飲食未開。胃氣未動。是誠清虛之府。此時開
口。調燮極須得宜。保嬰諸書。皆云分娩之時。口含血塊。
啼聲一出。隨卽嚥下。毒伏命門。他日發爲驚風痘疹等



證。此說固似有理。然嬰兒通體。無非血氣所結。而此亦血氣之餘。何以毒遽如是。即使嚥之。亦必從便而出。何以獨留爲害。無足憑也。惟是形體初成。固當爲之清理。其法於未啼時。用軟帛裹指。拭去口中血穢。以清臟腑。此亦初誕之要法。不可無也。張景岳

初生小兒。口中血泡。幼科有謂當用軟帛拭出。以解他時痲痘毒。然道家以此爲混元毬。能補益人精血。能益他人。獨不益本人乎。慎不可去也。醫參

開口

小兒初誕。以甘草少許。沸湯泡淡。不宜太甜。用軟帛蘸汁。徧拭口中。去其穢濁。隨用胡桃肉。去皮嚼爛。以稀絹

包如小棗。內兒口中。使吮其汁。非獨和中。且能養臟。最佳。○若母氣素寒。小兒清弱者。只以淡薑湯拭口。去胃寒。通神明。并可免吐瀉之患。拭後。仍用胡桃法如前。○一法。以牛黃半分。同硃砂研勻蜜調。如前與吮。極能辟邪去穢。除熱安神。然必母氣多熱。小兒肥盛者可用。清弱者不宜用。○古法拭口。多用黃連。不知黃連大寒大苦。小兒以胃氣爲主。安得初生。卽可以苦劣之氣相犯。致損胃氣。他日變嘔變瀉。由此而起。大非所宜。○古法多用硃砂開口者。按陳文中曰。小兒初生。便服硃砂輕粉黃連。欲下胎毒。不知此皆傷脾敗陽之藥。輕粉下痰損心。硃砂下涎損神。實者服之輒弱。弱者服之易傷。反



致變生諸病。不可不察。張景岳

小兒初生未啼時。以指輕探兒口。挖去汚血。隨以甘草湯。軟帛裹指。蘸拭口中涎沫。然後看兒面色。若身面俱紅。脣舌紫赤。知有胎毒。用鹽茶。以帛蘸洗其口。去其粘涎。日五六次。蓋兒之胎毒。藏於脾胃。口中多有粘涎。馬牙鵝口。重舌木舌。皆從此起。每日洗拭。則毒隨涎去。病從何來。倘胎毒重。須洗過週歲。若兒面脣色淡。此爲胎寒。則不可用鹽茶。惟以淡薑湯洗拭。日三次。薑能開胃和中。最切於時用者。陳飛霞

戒灸

北方誕後三日。每用艾灸顙門。以免驚風。緣北方地寒。

故俗灸之以禦寒。善調護者。何必令兒受此一番痛苦也。今南方亦效之。予見灸後發熱便秘。因而驚搐。遂致不救。殆無事生事也。詎思南方地熱。孕婦又不斷慾食。胎已受毒。加之以灸。是以油濟火。曷克當之。赤水玄珠

浴兒

凡浴兒湯。須令冷熱調和。冷熱失所。令兒驚。亦致五藏疾。冬不可久浴。久浴則傷寒。夏不可久浴。久浴則傷熱。數浴背冷。則發癩。不浴。又令兒毛落。千金方

兒生三日。以桑槐榆桃柳各取嫩枝三寸長者二三十節。煎湯。看冷熱。入豬膽汁二三枚。浴之。○小兒洗浴。不可先斷臍帶。候洗了方斷。不致水溼傷臍。可免臍風臍



瘡等證。證治準繩

三日浴兒。俗禮也。倘兒生脆弱。遲十日半月。擇晴明吉日。於無風房內浴之。赤水玄珠

剃頭

兒生滿月。剃頭。須向密室溫暖處。剃之。爲其氣血未盈。寒風易入。剃後。用杏仁三枚。研細。入薄荷三葉。再同研。將麻油滴三四點。合膩粉拌勻。擦頭上。能避風邪。免生瘡癬熱毒。證治準繩



胎證

夢生

小兒初生。不能發聲。謂之夢生。多不知救。深爲可憫。勿斷臍帶。用火炙其胞衣。使煖氣入兒腹。更以熱湯蒸洗臍帶。取貓一隻。以布袋裹其頭足。拿住貓頭。向兒耳邊。以口嚙貓耳。貓叫一聲。兒卽醒而開聲。○又有因產難。或冒風寒。生下兒。氣欲絕。不能啼者。亦以前法。更令父母以口氣呵而接之。陳飛霞

不啼

小兒初生。氣絕。不能啼者。必是難產。或冒寒所致。急以



棉絮包抱懷中。未可便斷臍帶。將胞衣置爐中燒之。仍
撚大紙條。蘸油點火。於臍帶下熏之。蓋臍帶連兒。熏時
則火氣由臍入腹。更以熱醋湯。盪洗臍帶。須臾氣回啼
哭。方可斷臍。○兒生不啼哭。不吞乳。奄奄如死者。急看
喉間。懸癰上腭有小泡。用指摘破。以帛拭去惡血。卽能
出聲吞乳。三因方

不乳

不乳。謂初出胞胎。不吮乳也。其故有二。不可不辨。兒生
腹中。臍糞未下。能令小兒腹滿氣短。嘔吐不乳。當用一
捻金治之。若因母過食寒涼。胎受其氣。兒必腹痛多啼。
面色青白。宜勻氣散主之。若四肢厥逆者。理中湯主之。

眼不開

兒生眼閉呻吟者。因受胎熱所致。宜用天竺黃散。并與母喫。復以竹筒煎湯洗眼。或以熊膽化水洗眼。一日七次。證治準繩

不小便

兒生不尿者。因在胎時。母恣食噉。熱毒之氣。流入胎中。是以生而臍腹腫脹。小便不出。如臍四旁有青黑色。及口撮者。卽不可救。如未有青黑色。但不飲乳者。宜服葱乳湯。貼豆豉膏。證治準繩

不大便



俗名鎖肚。由胎中受熱。熱毒壅盛。結於肛門。閉而不通。急令婦人漱口吮咂兒前後心。并臍下手足心。共七處。凡四五次。以輕粉半錢。蜜少許。溫水化開。時時服之。以通爲度。如更不通。卽是肛門內合。當以物通之。急以金玉簪尖。看其的處。刺穿作孔。以蘇合香丸作挺。納入孔中。糞出爲快。若肚腹膨脹。不乳呻吟。一七。難望生也。證

治準繩

噤風

初生兒須防三病。一撮口。二著噤。三臍風。皆急病也。著噤尤甚。過一臘方免。其候。牙關緊急。喫乳不穩。啼聲漸小。口吐涎沫。急看兒上腭。有點子。先以指甲輕輕招破。

次服定命散。辰砂全蝎散。如口噤不開。服藥不效者。用生南星。去皮臍研末。龍腦少許。合和。用指蘸生薑汁。於大牙根上擦之。立開。凡臍風撮口噤風。三者雖異。其受病之原。則一也。大抵裏氣鬱結。壅閉不通。竝宜煎豆豉汁與喫。取下胎毒。聖惠方

撮口

外證舌強脣青。面目黃赤。氣息喘急。啼聲不出。飲乳有妨。若口出白沫。四肢冷者。不可救療。其或肚脹青筋。弔卵引痛。此皆腸胃鬱結不通所致。治貴疏利。宜辰砂膏。初生七日後乃免。李仲南

嬰兒胎氣挾熱。亦因母有邪熱傳染。或生下洗浴當風。



致令啼聲不出。乳哺艱難。名曰撮口。病在七日之內尤甚。急風散主之。張煥

小兒口頻撮者。氣不和也。蓋脣應乎脾。氣出於肺。脾虛不能生肺。故口頻撮。異功散補脾生肺為良。陳飛霞

初生小兒。鵝口撮噤。並是出胎客風著顛臍所致。以艾灸三壯。及烙之。愈。顛顛經

臍風

臍風者。謂斷臍之後。被水溼風冷所乘。侵於臍中。流入心脾。遂令腹脹臍腫。身體重著肢強。多啼不能吮乳。甚則發搐。若臍邊青黑。撮口不開。是為內搐。不治。爪甲黑者。即死。其或熱在胸堂。伸縮努氣。亦令臍腫。治宜龍膽



湯主之。孫思邈

此證受病之原。皆緣胎毒。大概裏氣壅滯。總宜取下胎毒爲好。不可因循。古方天麻丸。定命丹。朱銀丸。可量與之。雖危多活。每見臍風撮口。七日內見之。百難一生。赤水玄珠

此證宜先用控痰散吐風痰。次用益脾散和脾。再用辰砂膏利驚。若手足攣拳。口噤不開者。不治。類萃

兒初生一七日內。患臍風撮口。百無一效。有一妙法。看兒齦上。有小泡如粟米狀。以溫水蘸綿裹指。輕輕擦破。不藥神效。三因方

古人之論臍風。皆謂由於水溼風冷所致。予則以爲古



論猶未盡也。蓋臍風有內外二因。有可治不可治之別。外因者。風溼所傷。內因者。稟父之真陽不足也。凡男子之命陽不足者。生子必有臍風。其外因者。病發於二三四五日之間。病生於六腑。故可治。內因者。必發於六七日之間。病生於五臟。故不可治。但看小兒不時噴嚏。更多啼哭。吮乳口鬆。是真候也。陳飛霞

垂癰

小兒出胎六七日。舌上有物。如蘆籜盛水狀者。名曰垂癰。以綿纏長鍼。留刃處如粟米大。刺令去血。消息一日未消者。又刺之。三刺自消。有著舌下者。名重舌。著上腭者。名重腭。著齒斷上者。名重斷。皆刺去血。刺後。鹽湯洗



拭。用如聖散。或壹字散。糝刷。千金方

舌證

微露卽收名弄舌。伸長收緩名吐舌。弄舌者脾臟有熱。致令舌絡牽緊。時時伸出。用瀉黃散。或飲水者。脾胃虛而津液少也。兼面黃肌瘦。五心煩熱者。疳也。用胡連丸。大病未已。而弄舌者凶。小兒直訣

舌腫硬粗大滿口。名木舌。由風熱盛也。不急治。則塞殺人。宜服瀉黃散。玉露飲。以消黃散擦之。有小舌附於舌下。名重舌。以蒲黃傅之。內服當歸連翹湯。蓋舌者心之苗。心熱則生瘡破裂。肝壅則血出如湧。脾閉則白胎如雪。總宜涼散上焦。及心肝脾三經邪熱爲主。初虞世



鵝口

兒初生。口裏白屑滿舌。如鵝之口。故名。由在胎受穀氣盛。心脾熱氣熏發於口。治用井花水拭之。黃丹煨。出火氣。糝之。不效。煮栗莢汁。以綿纏指拭之。○簡要用牙硝細研。於舌上糝之。日三五度。○秘錄用桑皮汁和膩粉傅之。證治準繩

臍溼臍瘡臍突

嬰兒臍中腫溼。經久不瘥。若至百日。卽危。宜急治之。用枯礬龍骨等分爲末。入麝少許。搗拭臍乾。糝藥時。切須避風。滑伯仁

絳帛灰。傅臍中。○乾蝦蟆牡蠣各一枚。燒灰研敷。○破

屋上爛草爲末。頻糝效。證治準繩

浴兒水入臍中。或尿溼綳袍。致臍腫爛成瘡。或解脫。風襲經絡。則成風癩。若臍腫不乾。久則發搐。巢氏病原

臍突。因兒初生洗浴。繫臍不緊。穢水浸入。旬日外。臍忽光浮如吹。治宜白芍藥湯。加苡仁。另用外消散塗貼。自平。曾氏

胎驚

胎驚者。其候。月內壯熱。翻眼握拳。噤口咬牙。身腰強直。涎潮嘔吐。搐掣驚啼。腮縮顙開。或頰赤。或面青眼合。凡胎風眼合。不可誤作慢驚。而用溫藥。先宜解散風邪。利驚化痰。王肯堂

百日內發搐。真者不過兩三次必死。假者頻發不死。真者內生驚癇。假者外傷風冷。錢仲陽

月裏生驚。取豬乳研辰砂牛黃各少許。調拭口中。神效。

田氏

如無豬乳。以活蚌剖開。取水數匙。服之即效。

胎癇

胎癇者。因未產前。腹中被驚。或母食酸鹹過多。或爲七情所汨。致傷胎氣。兒生百日內有者是也。發時。氣逆痰作。目上視。身反張。啼聲不出。先用參蘇飲和解。次以不驚丹。或琥珀抱龍丸間投。輕者可愈。重者難全。曾氏

胎熱

胎熱者。因母孕時。食熱物過多。令兒生下。身熱面赤。口中氣熱。焦啼燥渴。或二便不通。以木通散。煎與母服。使入於乳。兒飲漸解。勿求速效。以涼藥攻之。致嘔吐而成大患。慎之。壽世保元

胎寒

胎寒者。乳母孕時受寒。生下再感外邪。令兒面白肢冷。大便青黑。口冷腹痛。身起寒慄等證。宜當歸散治之。壽世保元

胎肥

胎肥者。生下肌肉肥厚。遍身血色紅。滿月後。漸漸羸瘦。目白睛紅。五心煩熱。大便難。時時生涎。宜浴體法。證治準



胎怯

胎怯者。生下面無精光。肌薄便白。身無血色。哽氣多嘔。目無神采。亦宜浴體法。證治準繩

胎黃

胎黃者。因乳母受熱。而傳於胎。兒生遍體面目皆黃。狀如金色。身上壯熱。大便不通。小便如梔子汁。乳食不思。啼哭不止。宜地黃湯主之。壽世保元

胎赤

胎赤者。因孕婦過食辛熱之物。以致毒熱凝結。蘊於胞中。遂令小兒生下頭面肢體赤若丹塗。故名胎赤。當以



清熱解毒湯主之。熱盛便秘者。蔣氏化毒丹主之。醫宗金鑑

無皮

嬰兒生下無皮。其證有二。或因父母素有楊梅結毒。傳染胞胎。故生下或上半身赤爛。或下半身赤爛。甚至色帶紫黑。又有因月分未足。生育太早。偏體浸漬。紅嫩而光。二證俱屬惡候。遺毒者。內服換肌消毒散。外用清涼膏。或鵝黃散敷之。胎元不足者。內服當歸飲。外用稻米粉撲之。醫宗金鑑

小兒初生。其身有如湯泡火傷者。此皆產母過食膏粱所致也。母服清胃散。兒亦飲數匙。有身無皮膚。而不爛



赤者。由產母脾氣不足也。宜用粳米粉傅之。若嫩赤發熱者。由產母胃中火盛也。宜用石膏粉傅之。經云。脾主肌肉。肺主皮毛。故知病在脾肺也。證治準繩

赤遊風

小兒赤遊風證。多由胎中毒熱而成。或生後過於溫暖。毒熱蒸發於外。以至皮膚赤熱而腫。色若丹塗。遊走不定。行於徧身。故名曰赤遊風。多發於頭面四肢之間。若內歸心腹。則死。治法當服犀角解毒飲。如不愈。繼以藍葉散。外用砭法。刺出毒血。毒甚者。敷以神功散。毒輕者。不用敷藥。在百日內者。小兒忌砭血。以其肌肉難任也。須用豬肉貼法。或以赤小豆末。雞子清調塗之。甚效。醫



附方

一捻金

大黃

人參

黑丑

白丑

檳榔各等分

右爲細末。每少許。蜜水調服。

勻氣散

陳皮

桔梗各一錢

炮薑

砂仁

炙甘草各五分 木香三分

共爲細末。每五分。紅棗湯調服。

天竺黃散

治驚熱重舌口瘡赤眼等證。



天竺黃

鬱金

甘草

牙硝各半兩

硃砂一分

蟬蛻十四箇

麝香少許

共爲細末。每服半錢。蜜湯調下。

葱乳湯 治初生不尿。

葱白三四寸。四破之。以乳汁半盞煎灌。

豆豉膏

黑豆一勺

田螺十九箇

葱一大把

右搗爛。芭蕉汁調。貼臍下。

定命散 治初生口噤不乳。

蟬蛻二十七枚 全蝎二十七箇

右爲細末。入輕粉少許。和研。乳汁調服一字。



辰砂全蝎散

治初生口噤。

辰砂半錢

全蝎二十箇 礪砂

龍腦

麝香各一字

右爲細末。乳母唾調。塗脣裏齦上。或豬乳調少許。入口內。

辰砂膏

辰砂三錢

礪砂

牙硝各一錢 元明粉二錢

珍珠一錢

麝香一字

右爲細末。用厚油紙包封。自然成膏。每一豆許。薄荷湯下。月內嬰兒。用乳汁調塗爛上。令吮下。

急風散



蛇蛻皮

鉤藤

蝎梢

硃砂各一分

麝香

牛黃各半錢

右味研為細末。每一字。取竹瀝。同乳汁。調下。

龍膽湯 治胎驚臍風撮口壯熱。

龍膽草

鉤藤

柴胡

黃芩

桔梗

赤芍

茯苓

甘草各五錢

蛻蝦

大黃各一分

合研細末。棗湯調服少許。

天麻丸 利驚下痰。弔腸鎖肚撮口通用。

天麻

白附子

牙硝

全蝎

五靈脂各一錢 南星二錢 輕粉五分 巴霜二錢半



糊丸。麻子大。每十丸。薄荷湯化下。

硃銀丸。治胎風。壯熱痰盛。眼翻口噤。取下胎毒。

硃砂

水銀

蒸麩研泥

全蝎

南星各一錢

白附子錢半

天漿子

蘆薈

牛黃各五錢

鉛霜五分

殭蠶七箇

冰片一字

麝香少許

蜜丸。

控痰散

蝎尾

銅青各半錢 硃砂一錢

膩粉一字

麝香少許

右爲細末。每一字。臘茶調下。

如聖散

鉛粉

牛黃各一錢

硃砂

太陰二元精各二錢半



龍腦五分

前四味研細。再入龍腦。和勻。每用一字。糝兒口中。
一字散

硃砂

礪砂各錢半

龍腦

朴硝各一字

右爲細末。蜜調少許。鵝翎蘸刷口內。

胡連丸 治熱疔。

胡黃連

黃連各五錢

硃砂

蘆薈

麝香各二錢

前三味爲末。填入豬膽內。線扎。懸掛銚中。水煑數沸。
取出。研入蘆薈麝香。飯丸。麻子大。每服一二十丸。米
飲下。



當歸連翹湯

當歸

連翹

白芷各三錢 大黃

甘草各一錢

水煎。食後服。

玉露飲

寒水石五錢

石膏六錢

生甘草一錢

右爲細末。每三五分及一錢。食後。溫湯調服。

白芍湯

白芍一兩半 澤瀉七錢半 炙甘草二錢

上肉桂一錢半

右味呔咀。每二錢。水煎。空心溫服。

外消散

治初生臍突。



大黃

牡蠣各半兩朴硝二錢

前二味剉末。入朴硝同杵勻。取大田螺一枚。水半盃。活一宿。抄藥末一錢。用螺水調塗腫處。卽消。其螺放之。勿害。

不驚丹 治因驚氣逆作搐。常服疏風順氣。自不作驚。

茯神五錢

蝎梢五十尾南星

淡豉各五錢

枳殼一兩

蕪荑二錢

前五味爲末。再同蕪荑杵勻。醋煮。糯米粉糊丸。粟穀大。周歲每服三十丸。米湯下。

琥珀抱龍丸 抱龍之義。抱者保也。龍者肝也。肝應東方青龍。肝爲母。心爲子。母安則子安。心藏神。肝藏魂。

神魂既定。驚從何生。其藥性平。不僭不燥。祛風化痰。
鎮心解熱。小兒驚癇諸證宜之。

琥珀二錢 膽星一兩六錢 僵蠶二錢 雄黃三錢

天竺黃五錢 辰砂 人參 茯苓各三錢

鉤藤一兩五錢 牛黃五分 麝香一錢

右爲細末。用甘草八兩。熬膏爲丸。每丸重五分。金箔
爲衣。外用黃蠟包之。

木通散 治小兒膈熱府閉。諸瘡丹毒。母子同服。

木通 煨大黃 生甘草 赤茯苓各一錢

羌活 山梔子各二錢

右剉碎。每用二錢。入蘇葉些少。水煎。不拘時服。



當歸散

當歸

黃耆

桂心

細辛

龍骨

白芍各二錢

右爲末。每一字。乳汁調下。日三服。

浴體法 治胎肥胎熱胎怯。

天麻二錢

蝎尾

硃砂各五分

烏梢蛇肉

酒浸焙爲末

白礬

青黛各三錢麝香一字

右研勻。每用三錢。水三椀。桃枝一握。并葉五七箇。同煎至十沸。溫熱浴之。勿浴背。

生地黄湯 治小兒生下胎黃。

生地黄

赤芍

當歸

川芎

天花粉



豬苓

赤苓

澤瀉

生甘草

茵陳蒿

引用燈心。水煎。食前服。

清熱解毒湯

生地

黃連

連翹

赤芍

金銀花

木通

生甘草

薄荷葉

引用燈心。水煎服。

蔣氏化毒丹

犀角

黃連

桔梗

薄荷葉

生大黃

生甘草

元參各一兩青黛五錢

右爲細末。煉蜜爲丸。重六分。每一丸。燈心湯化服。

換肌消毒散



生地黃

當歸

川芎

皂角刺

赤芍藥

連翹

甘草

白芷

苦參

白蘚皮

防風

金銀花

土茯苓

引用燈心。水煎服。

清涼膏

石灰

四兩
未經水溼成塊者

用水泡之。沒指半許。露一宿。面上有浮起如雲片者。輕輕取之。微帶清水。視其多寡。對小磨香油亦如之。以順攪成膏為度。用雞翎擦之。自愈。

鵝黃散

黃蘗

石膏各等分



共研爲細末。撲之。溼則乾撲。乾則用豬膽調擦。

當歸飲

當歸

生地黄

白芍

川芎

白蘚皮

甘草

人參

黃耆

何首烏

白蒺藜

水煎服。

犀角解毒飲

犀角

黃連

防風

荊芥

生甘草

生地黄

赤芍

連翹

牛蒡子

金銀花

引用燈心。水煎服。

藍葉散

藍葉五錢

黃芩

大黃

柴胡

犀角屑



梔子各二錢升麻

石膏

生甘草各一錢

右爲粗末。每一錢。水一小盞。煎五分。去粗。兌竹瀝酒盃。煎三兩沸。放溫。量兒大小用之。氣怯弱者。可去

大黃。

砭血法 治丹毒。

口吮毒血。各聚一處。用細磁器擊碎。取鋒芒者。將筋頭劈開夾住。用線縛定。兩指輕撮筋梢。令磁芒對聚血處。再用筋一根。頻擊。刺出毒血。砭後。毒甚者。以神功散敷之。毒輕者。不可用。恐皮膚既破。草烏能作痛也。如患在頭者。不用砭法。祇宜臥鍼。倒挑患處。出毒血。則愈。



雜病

變蒸

小兒變蒸。古無是說。至晉王叔和始言之。繼自隋唐巢氏以來。日相傳演。其說益繁。然以余觀之。則似有未必然者。何也。蓋兒胎月足離懷。氣質雖未成實。而臟腑已皆完備。既生之後。凡長養之機。則如月如苗。一息不容有間。百骸齊到。自當時異而日不同。豈復有此先彼後。一變生腎。二變生膀胱。及每變必三十二日之理乎。又小兒之病與不病。所見所治。蓋亦不少。凡屬違和。不因外感。必以內傷。初未聞有無因而病者。又見保護得宜。



自生至長。毫無疾病。雖有暗變之說。亦不能信。余恐臨證者。有執迷之誤。故道其愚昧若此。張景岳

熱

小兒之病。惟熱居多。夫熱有潮熱驚熱夜熱餘熱食熱疳熱壯熱煩熱積熱風熱虛熱客熱痰熱寒熱血熱瘡疹熱十六者。大同小異。熱之始發。必有所因。潮熱發歇有時。驚熱顛叫恍惚。夜熱夕發旦止。餘熱寒邪未盡。食熱肚腹先發。疳熱骨蒸盜汗。壯熱一向不止。煩熱心躁不安。積熱頰赤口瘡。風熱汗出身熱。虛熱困倦少力。客熱來去不定。痰熱涎嗽飲水。寒熱發如瘧狀。血熱辰已發熱。瘡疹熱。耳鼻尖冷。諸證各有所歸。其間或有三兩

證交互者。隨其輕重而治之。楊仁齋

小兒純陽之體。不獨火之一字。生熱爲患。卽風暑燥溼。皆從火化。故清涼之劑。活幼者多用之。而不疑。一見壯熱面赤。不惡風。無涕淚。卽是火證。火鬱當發。今火旣發。何可更散。速以涼藥濟之。但當視其在何臟腑經絡。氣分血分。參辨兼證。又當視其兒質之虛實。而用甘寒苦寒以降之。則熱無不退矣。辨其熱在氣分。卽瀉火以保元氣。熱在血分。卽瀉火以保陰血。每見病家。視苦寒若砒鴆。以致火甚之兒。氣血枯焦。頃成不救。更有久熱陰燄之證。醫家不知以水濟火。習用消散之藥。致令元氣益傷。變成慢驚者。不可勝紀。予用養陰益氣。十中猶救



五六。至於風化爲火。火靜則風熄。暑化爲火。火退則暑平。若專事疏解。則火勢愈盛。而驚作矣。○身熱飲水者。熱在內。身熱不飲者。熱在外。飲多飲冷者。爲實熱。飲熱而微者。爲虛熱。○煩熱者。熱在膈間。表邪初入於裏。故煩。裏實上干心胸亦煩。煩之甚則躁。或發表。或通裏。或瀉心。或養陰。四者酌而行之。○潮熱自內而發。如水之潮。應時而至。多屬陰虛與內傷。發熱時熱時止者。同類。雖有外邪。亦必由虛而入。經所謂邪之所湊。其氣必虛者。是也。故治潮熱。不得妄行表散。雖當和解。亦以陰血爲主。用藥之法。須於補中益氣。秦艽扶羸。柴胡鼈甲數方。酌而用之。○潮熱與陰虛生內熱之熱相似。而又不

同。陰虛生內熱。是人身之陰陽不相濟。只宜養陰。此則爲六淫之邪內陷。必提出六淫之邪而後已。○壯熱之壯字。卽內經壯火食氣之壯字。若不急治。則氣血受其煎熬。害人最速。故用藥如救焚。○壯熱無虛。皆實證也。六淫之邪。惟溼無壯熱證。○壯熱無補法。辨證的確。瀉邪以存元氣。便是補。在表者汗之。體若燔炭。汗出而散是矣。在裏者下之。急下存陰是矣。如謔言汗渴之有賴於白虎。斑狂失血之有賴於犀角地黃。皆刻不容緩者也。○書云。壯熱者。一向熱而不已。非也。熱之甚者爲壯。不甚者爲溫。溫熱亦有虛實。虛者。正氣虛也。不能爲壯。實者。邪氣實也。邪氣溫溫不去。體澤者屬溼。體枯者屬

燥。燥火不甚。亦溫溫也。在夏令秋初多屬溼。秋暮冬初多屬燥。燥溼之辨。不可混也。○一向熱而不已。有疳積之熱。有陰虛之熱。有當補脾。有當養陰。須分辨施治。○陽邪陷入陰分。其熱自陰分而達於陽分。與瘧熱相似。而實不同。瘧爲陰陽交爭。此爲陽陷於陰。故但熱不寒。若獨用表散藥。則藥力從陽分而泄。與陷入陰分之邪。不相會面。何由相引而出。考孫真人治風勞。有柴前梅連散一方最妙。柴前升散藥也。只能走表。不能入裏。梅連攝之。使入陰分。陰分之邪。得與柴前會面。柴前本升散之性。自應復出之陽。陰分之邪。得以相引而出。是梅連爲柴前之嚮導。梅連亦發散藥也。○骨蒸者。骨裏蒸

蒸然熱出。陰虛也。治宜秦艽鼈甲散。鼈甲骨屬。用以治骨。○胎熱者。得之在母腹中。生下便有熱證。輕輕一散。托出胎疹。是從外而解也。吉。若不發疹。喉舌上腭。或生瘡腫。不能舐乳。是熱蘊於內。當從內泄。少與生大黃。金石藥殺兒甚速。○初生有小熱。不可服藥。天之生人。生物。皆賴此火。無此火。何能生。更何能長。故初生曰赤子。此火一瀉。生機敗矣。惟火甚者當瀉。不瀉則能作病。小

兒諸熱辨

小兒發熱。其要有四。一則外感。二則瘡毒。三則痘疹。四則疳積。四者之外。如飲食驚風。陰虛變蒸之類。雖亦有之。然各有其說。均當詳辨。○小兒發熱。若熱隨汗退者。

外感證也。若汗出熱不退。別無癰腫。耳後紅筋燦然。及
眼淚指冷。脈緊數者。是痘疹也。○小兒飲食內傷。本無
發熱之證。蓋飲食傷臟。則脹痛吐瀉。本非肌表之病。焉
得發熱。今人但見小兒發熱。多言傷食。妄行消導。謬亦
甚矣。其或飲食內傷。風寒外感。表裏兼病。而發熱者。亦
常有之。然當察其食之有無。非可混行消耗也。○小兒
疳積發熱。此誠飲食內傷所致。然必成痞成疳。陽明鬱
積既久。所以內外俱熱。非暴傷飲食者之比。亦非肌表
發熱者之比。○小兒有陰虛發熱之證。名爲童子勞。當
於虛損門求法治之。○內熱與外熱不同。內熱以五內
之火。熱由內生。病在陰分。故內熱者宜清涼。不宜升散。

升散則內火愈熾。火空則發也。外熱以膚腠之邪。風寒外襲。病在陽分。故外熱者宜解散。不宜清降。清降則表熱愈留。外內合邪也。此外熱內熱之治。其不同者有如此。欲分內外之辨。則外熱者其至必驟。內熱者其來必緩。但察其絕無表證。而熱在臟腑七竅。三焦二陰。筋骨肌肉之間者。皆是內熱。但內熱之證。亦有虛實。實者宜從正治。虛者當從反治。反正之間。冰炭之異。○凡嬰兒諸熱。有因別證而作者。當從所重者而治之。張景岳

選案

小兒百病。先從熱起。有感風熱者。則惡風頭痛。脈浮嗽嚏。有傷食熱者。則手心熱甚。噯氣吐食。有癖積熱者。則

頰赤口瘡。有痘疹熱者。則耳鼻尖冷。兩目含淚。耳紋現。中指冷。有驚熱者。則面青心悸。啼叫恍惚。有疳熱者。則形瘦多渴。骨蒸盜汗。泄瀉肚大。種種不同。隨證治之。然疑似之間。有古人未傳者。張季明云。一兒外感寒熱。用發表藥。汗出熱退。過日復熱。便秘。裏未解也。服四順飲。利行熱退。隔日又熱。小便短赤。服導赤飲。熱退。過三日又熱。庸劣無措。診脈已和。既發汗。又利便。其兒已虛。陽無所歸。所以發熱。以六神散。和其胃氣。加烏梅酸收。陽氣歸內。自愈。又一兒。表裏俱熱。頰赤口乾。小便赤。大便秘。用四順飲。利動臟腑。熱去復熱。裏解而表未解也。發散微汗熱去。隔日又熱。此無他。表裏俱虛。氣不歸元。而

陽浮於外也。以六神散入粳米煎。和其胃氣。陽氣歸內。身體自涼。此等處最易誤人。特揭出。以補千古之缺。慈幼筏

驚風證治總論

驚有四證八候。四證者。驚風痰熱是也。小兒熱盛生痰。痰盛生驚。驚甚發搐。搐甚則牙關緊急。而八候生焉。肝主風。脾主痰。肺作熱。心發驚。四證相臨。重者先發。○八候者。一搐二擗。三掣四顛。五反六引。七竄八視。是也。搐者。兩手伸縮。擗者。十指開合。掣者。肩膊搐掣。顛者。四體顛動。反者。身仰向後。引者。臂若開弓。竄者。目直似怒。視者。睛露不活。仁齋直指



驚搐一也。而有晨夕之分。表裏之異。身熱力大者爲急。驚。身冷力小者爲慢驚。仆地作聲。醒時吐沫者爲癇。頭目仰視者爲天吊。角弓反張者爲痊。治各不同。○搐。頻者。風在表。易治。宜發散。搐稀者。風在臟。難治。宜補脾。雙

全善

小兒驚搐。目劄目直者。乃肝經風熱所致。凡病之新久。皆能引動肝風。肝風內動。則上入於目。故目劄。若熱入於目。牽其筋脈。兩眦俱緊。不能轉視。故目直也。亦有因飲食停滯中焦。清陽不升。濁陰不降。肝木生發之氣。遏而不升。致生風者。亦有因吐瀉。土敗木侮。致生風者。皆不可服驚藥。張氏醫通

若口中氣熱。搐而有力。屬形病俱實。宜大青膏以散風邪。若口氣不熱。搐而無力。屬形病俱虛。宜異功散以補脾土。六味丸以滋肝木。鉤藤飲以清肝火。若因風邪鬱熱。而變諸證。當清散風熱。若外邪既解。而諸證不愈者。當實脾土。補肺金。若竟治其風。恐脾氣復傷。諸證蜂起矣。薛立齋

小兒驚癇。一從虛邪客熱相搏。而生其候。當補養安和。卽愈。加以生冷。及消伐太過。卽死。顧顯經

童幼。肌肉筋骨藏府血脈。俱未充長。陽則有餘。陰則不足。不比七尺之軀。陰陽交盛也。惟陰不足。陽有餘。故易生熱。熱盛則生痰。生風。生驚。亦所恆有。設當日直以熱

痰風驚四字立名。則後人不眩。乃節去二字。以驚字領頭。風字煞尾。後人不解。遂以爲奇特之病。又以其頭搖手勁。而立抽掣之名。以其口噤脚攣急。而立搐搦之名。以其脊強背反。而立角弓反張之名。不知小兒之肌腠未密。易於感冒風寒。風寒中人。必先中於太陽經。太陽之脈。起目內眥。上額交巔入腦。還出別下項。夾脊抵腰中。是以病則筋脈牽強。因生出種種不通名目。而用金石藥鎮墜。外邪深入藏府。千中千死。間有體堅證輕得愈者。又詫爲再造奇功。遂至各守顛門。雖日殺數兒。不自知其罪矣。如方書云。小兒八歲以前無傷寒。不知小兒易於外感。易於發熱。傷寒獨多。初傳太陽一經。早已

身強多汗。筋脈牽動。人事昏沉。湯藥亂投。死亡接踵。何
繇見其傳經解散耶。又剛瘧無汗。柔瘧有汗。小兒剛瘧
少。柔瘧多。世醫見其汗出不止。神昏不醒。往往以慢驚
爲名。而用參耆朮附等藥。閉其腠理。熱邪不得外越。亦
爲大害。但比金石藥爲差減耳。所以凡治小兒之熱。但
當徹其出表。不當固其入裏。仲景原有桂枝法。若舍而
不用。從事東垣內傷爲治。毫釐千里。最宜詳細。要知吾
闢驚風之說。非謂絕無驚病也。小兒氣怯神弱。凡遇異
形異聲。驟然跌仆。皆生驚怖。其候。面青糞青。多煩多哭。
不比熱邪塞竅。神識昏迷。對面撞鐘放銃。全然不聞者。
細詳勘驗。自識驚風鑿空之謬。喻嘉言



小兒瘧病。俗謂驚風。身體柔脆。易感風邪。固矣。然小兒純陽之體。易生內熱。使腠理開張。風邪乘隙而入。則又所以易感風邪之由也。世醫遽投腦麝金石。若百服百死。竟爲鳩毒。豈有尚流傳其方者乎。亦必有用之收功者。所以世醫不復顧慮也。不知用之而當者。乃小兒中實熱之證。用之不當者。係小兒中虛熱之證。苟不察其虛實。而概與之。所以同於鳩毒耳。然小兒風熱在表。亦自有驅風散熱治法。卽邪熱壅盛於內。急爲宣通。亦自有大承氣湯可與。何必以腦麝散其真氣。以金石墜其真陽。致起他變乎。此世醫言驚風傳方之所以多夭折生命也。苟不爲明其故。而但訾議之。何以服世醫之談

驚風。稱傳方者哉。魏荔彤

幼科驚證。自喻氏以熱痰驚風四字立名。大剖從前之訛。實爲確論。葉香巖亦宗之。然更有未盡者。近多冬暖失藏。入春寒溫間雜。小兒吸受其邪。先傷肺經。起自寒熱氣麤。延綿失治。漸從包絡內傳上部。雖有微汗。而痰多鼻扇。煩躁神蒙。病家惶懼。輒云變爲驚證。動用香開。妄投金石。以致陰液消亡。熱勢愈張。正不敵邪。肝風陡動。漸見肢牽目竄。痙閉發厥。勢多傾敗。若於病未猖獗之前。先以辛涼開肺。繼以甘寒化熱。佐以潤劑降痰。兩候自痊。此蓋溫邪陷入。陰液內耗。而動肝風。實非驚恐致病也。若誤以驚藥治之。恐幼穉之含冤不少。故爲之



一辨。吳醫彙講

驚風二字。千古疑域。嘉言欲打破人鬼關。其實未易能也。蓋因嬰兒傷寒病瘵。每有反張搐搦之態。錢仲陽偶立驚風之名。門人繼述不善。遂以驚字爲驚嚇之驚。風字卽驚字之變文。以致幼科書中。凡青爲風者。皆曰青爲驚。謬謂小兒之病。悉由驚而生風。誤以傷寒無汗之證爲急驚。以傷風自汗之證爲慢驚。以脾敗胃傷之證爲慢脾。妄立諸驚名色。眩惑後人。是仲陽偶以一字之乖訛。而後世受禍如此其烈也。至於見證立名。更爲舛謬。如小兒傷寒病瘵。外證有頭項強。背反張。目上竄。此金匱所謂能仰不能俯者。屬太陽。則稱天弔驚。眼目下

視。卽金匱之項背几几。海藏之低頭下視者。屬二陽合病。則稱看地驚。更有諸多不通名目。莫能枚舉。設人病陽明內實。踰垣上屋。則將名飛天驚矣。陰極發躁。欲臥泥水中。則將名擗地驚矣。荒唐鄙野。雖奚童嬰婢。有所不言。而醫者公然筆之於書。後人見其證皆驚證。紋悉驚紋。相與依樣葫蘆。一倡百和。不知論證可任其牽強。而治療不容於假借。如傷寒病瘕。由風寒溼三氣合邪。病在太陽陽明少陽。與心驚肝風。脾痰肺熱。風中牛馬。若以爲驚風治之。則無辜之心肝脾肺。枉受剝膚。而風寒溼外至之邪。脩然磐石。可乎。因思幼科以搐掣名驚。今卽以搐字易驚字。屏去禍害之驚。祛除僮侗之風。總



名之曰搐。庶不駭人聽聞。而又不失病瘧之本來面目。復以急驚慢驚慢脾之三異端。易爲誤搐類搐非搐之。三寶筏。何爲誤搐。蓋小兒傷寒最多。由醫者治不如法。抑遏其邪。莫能外解。因而壯熱不退。遂變爲瘧。則有搐。搦反張之候。與內經諸瘧項強。諸風掉眩。諸寒收引之。例相符。歸於誤搐條下。俾臨證者。知爲傷寒病瘧。不致有開關鎮驚之害也。何爲類搐。蓋傷暑瘧痢。丹毒霍亂。客忤中惡。其證顯然。辨認旣明。一藥可愈。何至作搐。由醫者遷延時日。抑遏邪氣。無所發洩。亦有變爲搐者。搐非固有。所以謂之類搐。遵內經諸熱瞽瘧。皆屬於火之例。歸於類搐條下。各從本門爲治。以免截風定搐之患。

也。何爲非搐。蓋小兒吐瀉病後。脾敗胃絕。昏睡露睛。虛痰來往之證。幼科以爲慢脾風。更以大驚卒恐。神魂離散之證。爲急驚風。不知此二證。死生呼吸。猶敢以驚風稱之耶。因體景岳非風之意。竟以非搐名之。使後人知此等證候。全非風搐。而治風治搐之法。遠屏三舍。庶可保全性命。而不致於夭札無辜也。陳飛霞

發搐者。幼科之一大證。諸書皆以急驚慢驚名之。後世因其名。而重視驚字。每用金石鎮墜之品以治驚。此非其治之誤。乃名之不正也。蓋小兒百病。皆可生驚。其名則同。其實則別。徒習其名。而不責其實。何以爲治。按急驚慢驚之稱。非指病者而言。實指視者而言也。試詳論

之。急驚之來。先因於風。而生痰生熱。或熱數日而發。或熱一二日而發。或發於倉卒之間。其來也急而驚人。故曰急驚。慢驚多因於吐瀉之後。爲土敗木賊之證。其來也緩而難治。醫家見之。無有不驚者。故曰慢驚。古云。急驚驚爺娘。慢驚驚藥王。又慢脾論云。若逐風。則無風可逐。若療驚。則無驚可療。卽此二義。釋盡驚字之誤。若以急慢驚證。指小兒之抽掣。則何不曰急筋慢筋乎。若以其證。因七情之受驚而致。然驚雖跳動。而不致於抽掣。蓋跳動者。全身一躍。心驚所主也。抽掣者。手足時攔。肝木生風也。以之相較。迥然不同。何世俗之治此二證。於急驚。每不重在驅邪。而重在治驚。於慢驚。又不重在溫

補。而重在治驚。是皆名之不正。有以誤之也。予今爲之
正其名。而遵錢氏之稱。曰發搐。○發搐一證。論之已詳。
猶有未盡其變者。以小兒經絡空虛。百病皆能致搐。搐
雖同。而所以致搐者。異也。略舉所見數條參之。其一。百
日乳兒。初受驚風。痰涎入於心包。暫時雖愈。一遇驚風。
卽涎潮口噤。手足抽掣。少時痰滑。熱生病解而愈。當於
未發之前。治用橘紅半夏防風殭蠶天麻膽星菖蒲等
分。或少加牛黃辰砂竹瀝薑汁。杵丸。淡薑湯化服。透其
包絡之痰。名透涎丹。痰盡自不更作。若久而失治。必成
癩證。其一。風挾寒邪中於經絡。項背強直。腰身反張者。
名曰剛瘳。古用小續命湯。予用羌活愈風湯。加當歸附



子。多效。亦有脣口牽動。手足微搯。漸至癱瘓不收者。熱在絡也。用愈風湯。加梔子羚羊角。此百問所謂風挾寒邪。卽攣急。風挾熱邪。卽緩弛之類。亦有長夏先伏暑邪於內。而後受風者。俗謂之暑風驚。治法。若獨清暑。則風不解。若專疏風。則暑不除。亦用愈風湯。去蠶蝎。加石膏。名暑風飲子。輕者一服可定。重者亦可少殺其勢。蓋石膏。質重能降熱。氣輕能解肌。色白屬金。得西方之令。金能制木。木火交煽。此能平之。若伏暑吐瀉而作搐者。當與虛風同治。不在此例。更有發熱目竄。忽然抽掣啼叫者。俗名響驚。易治。壯熱痰湧。抽掣無聲者。俗名啞驚。難治。發熱抽掣。少時掣定。神氣清爽。能吮乳者。名假搐。無

妨。抽掣雖定。而神氣昏悶者。名真搐。難治。○散驚與定驚。原是二義。散者。疏其邪。定者。安其神。天麻鉤藤。所以散驚。勢從外解。與柴胡荆防。同爲疏散之用。肝主驚風。是也。辰砂琥珀。所以定驚。質從內鎮。與丹參茯神。同爲鎮靜之用。心藏神是也。須要分辨。許宣洽

驚風之要領有二。一曰實證。一曰虛證。而盡之矣。蓋急驚者。陽證也。實證也。乃肝邪有餘。風生熱。熱生痰。痰熱客於心膈間。則風火相搏。故其形證急暴。是爲急驚。當先治其標。後治其本。慢驚者。陰證也。虛證也。此脾肺俱虛。肝邪無制。因而侮脾生風。無陽之證也。故其形氣病氣俱不足。是爲慢驚。當專顧脾腎。以救元氣。雖二者俱

名驚風。而虛實之有不同。所以急慢之名亦異。凡治此者。不可不顧名思義也。○小兒驚風。肝病也。亦脾腎心肝病也。蓋小兒之真陰未足。柔不濟剛。故肝邪易動。肝邪動。則木能生火。火能生風。風熱相搏。則血虛。血虛則筋急。筋急則爲掉眩。反張搐搦強直之類。皆肝木之本病也。至其相移。木邪侮土則脾病。而爲痰爲吐瀉。木盛金衰則肺病。而爲喘促爲短氣。木火上炎則心病。而爲驚叫爲煩熱。木火傷陰則腎病。而爲水涸。爲血燥。爲乾渴。爲汗不出。爲搐爲痊。此五藏驚風之大概也。治法。一曰風。二曰火。三曰痰。四曰陽虛。五曰陰虛。所謂風者。以其強直掉眩。皆屬肝木。風木同氣。故云驚風。而實非外

感之證。今人不明此義。但以爲治風必須用散。不知外來之風則可散。而血燥之風不可散也。所謂痰火者。痰凝則氣閉。火盛則陰虧。此實邪之病本也。若痰因火動。則治火爲先。火以痰留。則去痰爲主。凡驚風之實邪。惟痰火爲最。風則次之。然邪實者易制。正敗者必危。蓋陽虛則陰邪不散。而元氣不復。陰虛則營氣不行。而精血何來。所以驚風之重。重在虛證。不虛不重。不竭不危。治虛之法。當辨陰陽。陽虛者宜燥宜剛。陰虛者宜濡宜潤。然善治陽者。氣中自有水。善治陰者。水中自有氣。造化相須之妙。旣不可混。又不可離者如此。設謂此非小兒之藥。此非驚風之藥者。豈驚風之病不屬陰陽。而小兒

之體不由血氣乎。張景岳

老醫常言。小兒驚搐。多是熱證。若驟用驚風藥餌。如白附全蝎川烏之類。便醫成壞證。只用導赤散。加防風。連進三服。導去心經邪熱。其搐即止。從孫道潤。幼患驚搐。甚危。諸醫療治益困。予授是方。二服立愈。後常救人。無不效者。恐人忽易。故著之。○幼穉欲令驚悸不作。在乎腎臟和平。故戴氏曰。治驚不若補腎。蓋心屬火。火性燥。得肝風則煙焰起。致生驚悸。補腎則水升火降。邪熱無侵。雖有肝風。驚自不作。證治準繩

選案

徐彥爲子。四歲。盛夏發熱。驚搐不已。腰曲目直。小便短

赤。面無神色。醫作傷寒治。不應。予視之。曰。火燥生風。風淫末疾。非傷寒也。用滋水清肝飲。一劑。汗解。便利熱退。予曰。瘧至矣。翌日果然。改用異功散。加麥冬五味服之。而愈。己任編

袁仲卿乃郎。入水捉彭蜺爲戲。偶仆水中。家人救出。少頃。大熱呻吟。醫以鎮驚清熱丸散與服。二日。昏迷不醒。胸高頭側。氣已垂絕。脈止蛛絲。謂曰。吾從來不懼外證之重。但脈已無根。不可救矣。此兒受病。何至此極。靜籌其故。良久。曰。得之矣。其父且驚且喜。願聞其說。余曰。驚風一證。乃前人鑿空妄談。小兒受其害者。不知幾千百億兆。後見方中行癩書。始知昔賢先得我心。此證因驚

而得。其實跌仆水中。感冷溼之氣。爲外感發熱之病。食在胃中。因而不化。當比夾食傷寒例。用五積散治之。醫者不明。以金石寒冷藥鎮墜。外邪深入臟腑。神識因而不清。食停胃中。得寒涼而不運。所進之藥。皆在胃脘之上。不能透入。轉積轉多。以致胸高而突。宜以理中湯。運轉前藥。倘得證減脈出。然後從傷寒門用藥。尚有生理。於是煎理中湯一盞。灌入。大爆一口。前藥一齊俱出。胸突頓平。頸亦稍硬。但脈仍不出。人亦不甦。余曰。此食尚未動。關竅堵塞之故。再灌前藥。熱已漸退。乃從傷寒下例。以元明粉化水。連灌三次。開其大腸燥結。夜下黑糞甚多。後以生津藥。頻灌而甦。○沙無翼。王生之表兄也。

得子甚遲。縱啖生冷。一夕吐食暴僵。醫以驚風藥治之。渾身壯熱。面若裝珠。眼弔脣掀。下利不計其數。診畢。謂曰。此慢脾風候也。脾氣素傷。更以金石藥重傷。今已將絕。故顯若干危證。本有法可救。但須七日方醒。恐信不篤。而更醫無識。反得謗罪生謗。王生堅請。監督其家。於是用烏蝎四君子湯。日灌一劑。每劑用人參一錢。渠家雖暗慌。然見面赤退。而色轉明潤。便瀉止。而動移輕活。亦自隱忍。至第六晚。忽覺手足不定。揭去衣被。喜吞湯水。始詆人參之害。王生張皇。任其轉請他醫。纔用牛黃少許。從前危證復出。重服理脾藥。又五日。方甦。寓意草

孫自範翁甥孫。患慢脾證。痰涎湧盛。咳嗽身熱。肢搖自

汗。嗜臥露睛。撮空手振。屢進補脾兼消痰逐風之劑。不應。翁商於予。予曰。此證風自內出。本無可逐。痰因虛動。亦不必消。只補脾土。諸證自退。但據所示兼證。則其面必眇白。眼必散大。舌必胖滑。頸必軟而頭必垂矣。翁曰。誠如所言。固知其虛也。乃救虛不應。究何故耶。予曰。證皆屬寒。方只救虛。使天柱未倒。固自響應。然逐風消痰之品。尚須削除。今頸軟頭垂。天柱已倒。虛上加寒。舍桂附何以追已去之陽。而甦垂絕之氣哉。乃寫參附養營湯方與之。囑曰。如阻以稚幼純陽。無補陽之法。則危在旦夕。翁歸。取藥煎飲。一劑各證悉減。三劑全除。次用異功散。加煨薑白芍。調理而健。

潛村醫案

一兒病手足搐搦。戴人視之曰。心火勝也。由保護太過所致。令淨掃地。以水洒溼。抱兒臥於地上。良久轉側。渾身泥漿皆滿。乃取井水洗之。卽瘥。張子和

急驚

經云。驚則傷膽。恐則傷腎。大凡可畏之事。猝然而至者。謂之驚。若從容而至。可以宛轉思維者。謂之恐。是驚急而恐緩也。夫驚證。大人亦有之。小兒最多。因其神志未堅。膽氣未充。故每遇稍異之形聲。卽陡然而驚矣。驚之所傷。由心猝及乎膽。由膽卽及乎肝。遂致心主君火。兼肝膽中相火風木驟然而起。證見搐搦瘰癧。神昏譫妄。肢冷厥逆。吐乳身熱。目竄口噤。種種所患。無非心肝膽



之見證。而實毫無外感之風邪。此因外受之驚。而動內之木火風也。故但當以一驚字。立爲病名。斯乃切當。因其內風沸起。遂加一風字。因病來迅速。又加一急字。故遂有急驚風之病名。此已屬牽強附會矣。至於今之混稱爲急驚風者。更屬背謬。總因小兒陰氣未充。外感之風溫風熱風火。以及寒邪化熱。并燥火諸證。最易傷陰。陰傷則血不營筋。液傷則脈絡滯澹。熱盛亦能使內之木火風相繼而起。所見之證。與受驚者。類亦相同。然實非因受驚而起。其所治之法。大有區別。如果因驚者。治宜安養心神。鎮驚定法。甘涼清內熱。柔潤熄肝風。或少佐芳香。通其竅絡。舒其結閉。至於剛熱燥澹表散之藥。

概不可用。若無驚而但感外邪者。有宜於涼散。有宜於溫散。有宜於苦寒清火。有宜於甘溫扶陽。或補或瀉。自當按六淫之邪而施治。與驚字毫無關涉。奈今之醫者。每遇非驚之證。因不能辨明六氣中所傷何氣。卻定不出病名。遂強將一驚字混入藉口。漫稱爲急驚風證。掩飾欺人。病家亦酷信之。以爲小兒防範難週。焉有無驚之理。其所訂之方。錯雜游移。不知治驚。總以心肝膽爲主。若治時邪。須兼肺胃脾腎三焦營衛經絡而論。大不相同也。更有一種稱慢驚風之病名者。尤屬怪誕不經。必當亟爲駁正。臨證指南

小兒風熱驚搐。乃常病也。搦時切戒把握手足。握持太



急。氣血偏勝。必傷其臂。搐時置一竹簞。鋪之涼地。使兒寢其上。待其搐力行。徧經絡。自止。張子和

小兒驚風發作之際。手足動掣。當聽其自定。或父母見病勢可畏。從而按伏之。豈知筋者。肝之合也。臨病發時。若按束其手足。則筋不舒伸。經絡爲風所閉。致成驚癇。鶴膝。變爲廢人。曾氏

慢驚

小兒慢驚。或因病後。或因吐瀉。或因藥餌。傷損脾胃。以致肢體逆冷。口鼻氣微。手足瘳癢。昏睡露睛。此脾虛生風。無陽之證也。亦有急驚日久。脾損陰消。致變慢驚者。婁全善所謂木虛則搐而無力。火虛則身寒氣冷。土虛



則吐瀉露睛。若土虛不能生金。金虛不能平木。木來侮土而致者。宜異功散加歸芍鉤藤。以補土平木。若脾土虛寒者。宜六君湯加烏頭蠍尾。泄瀉加炮薑木香。不應急加附子。以回陽氣。此乃藏府傳變已極。總歸於虛。無風可逐。無驚可療。若不審其因。泛用祛風化痰之劑。反促其危。薛立齋

慢驚證見眼睛昏定者重。竄視者重。四肢厥冷者重。汗出如流者亦重。口面忽作慘黯色者至重。眼目半開半合。乃陰盛傳入臟間。陽氣虧乏。脾爲至陰。次第入脾。故稱慢脾風候。○古云。病家怕驚不怕瀉。醫家怕瀉不怕驚。如泄瀉不止。且先治瀉。若更治風。則驚愈甚矣。仁齋直

指

問。慢驚言脾。而不言胃者。何也。蓋胃爲腑屬陽。脾爲臟屬陰。小兒純陽之體。病傳在腑。多自愈。在臟。多難治。故以在腑爲順。在臟爲逆。古人所以言脾不言胃也。證治合

參

凡治慢驚。若尚有陽證。未可驟行回陽。但與截風調胃。如蟬蝎散。醒脾散。若手足冰冷。卽與回陽。用烏蝎散。其腦麝銀粉巴硝等藥。一切禁斷。醫學入門

俗稱慢驚風者。不知起於何代。遺禍嬰孩。不啻萬億。就其所指之病而論。如吐瀉兼作。氣祛神倦。虛煩搖擲。痰喘不食。脈虛無力。睡則露睛等證。與病名毫不相關。究

其所指之病。是或由外感未清。或由諸病誤治。或由飲食失調。或由病後而成。以致吐則傷胃。瀉則傷脾。土衰不能生金。中虛木必乘剋。是皆內傷之病。治宜急顧本原。扶土生金。安胃和肝。溫養腎陽。猶慮弗及。若執慢驚風之名。概用鎮墜之藥。或散風清火。豁痰破氣。其禍可勝言哉。蓋是證始因中土已虛。風木已動。延久見出似驚之狀。實非因驚而起。奈何竟以慢驚風名之。豈非指鹿爲馬乎。要之。慢字若以急慢而論。則凡病之緩者。皆可稱慢。惟驚乃屬急證。不可以慢字加之。更當參東垣立齋景岳諸法。治無遺蘊矣。臨證指南

世人動曰慢驚。予獨曰慢證。慢字雖對急字而言。然所

以成此證者。亦由父母怠慢之故。或有汗多不止者。聽之。吐瀉不止者。聽之。以致汗多亡陽。吐久傷胃。瀉久絕脾而成。此危殆之候。何驚之有。庸醫見兒眼翻手搐。形狀似驚。而作驚治。是猶兒已落井。而復下之以石也。夏

禹鑄

暑風驚

真暑風。實證也。暑喜傷心。風喜傷肝。余製暑風飲子。以羌活防風治風。黃連石膏治暑。以餘藥治兼證。酌而行之。十生八九。若暑傷脾胃。或吐或瀉。而後發搐者。謂之暑風慢驚。虛證也。治之不當。十死八九。○吐瀉二者。易成慢驚。然吐更甚於瀉。止瀉之法。可用溫補。能受補則

生。吐則胃氣傷。胃氣傷則不能宣布津液。是以諸藥雜投。多無應驗。余思養胃之法。非寒非熱。必得生機活潑。方轉靈軸。因製黃土稻花湯。取效甚多。時人未之識也。○暑與心合。故喜傷心。暑風驚。有直中者。有由胃熱肝膽熱傳入者。由漸傳入。可緩緩用藥清之。直中之驚。一發卽死。不可不知。○驚搐方作。視其額熱肢熱。脈大而微數者。易解。若額熱肢冷。而脈細數之極者。皆暴脫之證也。○暑邪入心。認證的確。卽用清心之劑。黃連有用至五七日者。不可一二日不愈。便思改轍。書云。臟者藏也。病雖難入。亦復難出。故治法宜守。○暑風驚搐。額熱肢熱者。可用黃連瀉心收功。額熱肢冷者。不可用。何也。

黃連瀉心。實瀉脾也。實則瀉其子。子既虧。如何瀉得。○暑風有纏綿日久。人事不省。目斜目竄。咬牙涎湧者。爲痰阻心包。仍用牛黃膽星竹瀝薑汁菖蒲等透竅之藥。兼以清心。若人事清爽。聲音明亮。能食便調者。是臟證已罷。但手足強直。或反張。或拳曲蹙縮者。是大筋爲熱所傷。血不營經。不必用利痰及入臟藥。只宜重養陰血。兼以舒筋之味。久久自回。○強直證。用養陰藥。愈者多。緩弛證。宜兼健脾。苡仁扁豆。爲清暑溼之餘藥。○養陰藥。用生地丹皮當歸白芍麥冬。加桑寄生羚羊角秦艽鉤藤以舒筋。○暑風驚。大概胎氣壯。脾土不虧。能受清涼者可治。若吐瀉並作。額熱肢冷。搐不甚者。是爲暑風。

慢驚。清補兩難。六君加黃連。應藥者生。不應者死。椽村治

驗

睡中驚惕

小兒睡中驚惕。多由心腎不足所致。蓋小兒藏府脆弱。易為驚恐。且人之神氣。寤則行於目。寐則棲於腎。今心腎既虛。則神氣不能藏攝。故睡中驚惕。治宜補心湯。清心安神。有因驚嚇而作者。驚則動肝。故神魂不安。治宜抱龍丸。豁痰鎮驚。若因食鬱生痰而致者。治宜健脾化痰。加山梔柴胡以清熱。張氏醫通

癩

癩與驚相類。但癩發時。仆地作聲。醒則吐涎沫。驚則不



作聲。不吐涎沫。婁全善

小兒之癇有三。風癇驚癇食癇是也。風癇緣衣煖汗出。風因襲入。初時屈指如數物乃作。驚癇起於驚怖。大啼乃作。食癇其先不哺乳。吐而變熱後發。驚癇按圖灸之。風癇治以豬心湯。食癇當下乃愈。紫霜丸佳。千金方

癇。小兒之惡候也。蓋小兒血脈未斂。骨氣未聚。或爲風邪所觸。或因乳哺失節。停結癖積而得之。其候神氣怫鬱。瞪眼直視。兩目牽引。口噤涎流。腹肚脹膨。手足搐掣。或叫或啞。或項背反張。腰脊強直。但四體柔弱。發而時醒者。爲癇。若一身強硬。終日不醒。則爲瘖矣。楊仁齋

癇病。小兒常有之。諸書皆言積驚成癇。故有驚風三發

便爲癩之語。大概肝主驚風。初作不爲疏解。便投金石丸散。使邪留於心包肝膽。久而不除。生痰生熱。觸著便發。或目直喊叫。搖頭手掣。口吐白沫。或卒然昏仆。或作豬羊雞犬牛吼之聲。世有五癩之名。陰陽之別。多方雜出。愈治愈深。予治此證。惟以肝主驚風爲本。得之未久。體質旺者。用錢氏瀉青丸。去龍膽加橘半。以疏豁之。病久體弱者。用逍遙散。加橘半以疏達之。搐鼻散不時嚏之。兼以調和胃氣。久久自除。怡堂散記

此皆元氣不足之證。治以紫河車丸爲主。而以補藥佐之。設若泛行剋伐。復傷元氣。則必不時舉發。久而變危。

薛立齋



選案

一兒七歲發癩。每作。先君令飲人乳。後發漸疏而輕。至十四歲復發。服人乳不應。余用紫河車研爛。乳調如泥。日二三次服。至數具而愈。後常用加減八味丸。至二三歲發。而手足厥冷。仍用前法。佐以十全大補湯而痊。

薛立齋

客忤

客忤者。小兒神氣軟弱。忽有非常之物。或未經識見之人觸之。與兒神氣相忤而發病。吐下腹痛。面變五色。其狀似癩。但眼不上插耳。其脈弦急而數。失時不治。久則

難療。巢氏病源

物觸

物觸者。因小兒所愛之物。而強奪之。致令怒生。神隨物散。不食不言。神昏如醉。四肢垂躄。有若諸惡證候。莫知其故。須詢其父母。遂其所欲。以藥調理。神自安矣。馮氏錦

囊

啼哭

小兒有驚啼。有夜啼。有軀啼。驚啼者。由於風邪乘心。臟腑生熱。熱則精神不定。睡臥不安。故令兒驚啼。夜啼者。臟冷也。夜則陰盛。陰氣相感。故令兒夜啼。一云有犯觸禁忌。亦令兒夜啼。軀啼者。由於腹中痛甚。兒身軀張。氣蹙而啼也。又有胎寒而啼者。此兒在胎時。已受病也。其

狀腸胃虛冷。不消乳哺。腹脹下利。顏色青白。而時啼叫是也。萬全方

小兒夜啼有四證。一曰寒。二曰熱。三曰重舌口瘡。四曰客忤。腹痛面青。口有冷氣。曲腰而啼者。寒也。心躁面赤。小便赤。口熱腹暖。仰身而啼者。熱也。吮乳不得。口到乳上卽啼。急取燈照口。若無瘡。舌必重也。客忤者。見生人忤犯。而啼也。各隨證治之。三因方

夜啼有二。一曰脾寒。一曰心熱。夜屬陰。陰勝。則脾藏之寒益盛。脾爲至陰。喜溫而惡寒。寒則腹中作痛。故曲腰而啼。得燈火。其啼便止。其候面色青白。手足俱冷。不思乳食。治宜益黃散加鉤藤。若見燈愈啼者。此心熱也。心

屬火。見燈則煩熱內生。兩陽相搏。故仰身而啼。其候面色白。黑睛少。此屬腎氣不足。至夜陰虛而啼者。治宜六味丸。因驚者。參客忤驚啼治之。張氏醫通

夜啼者。脾藏冷而痛也。當與溫中藥。或花火膏主之。小兒直訣

小兒肝氣未充。膽氣最怯。凡耳聞驟聲。目視驟色。怖其神魂。醒時受怖。寐則驚惕。或振動不定。或忽爾啼叫。皆神怯不安之證。總宜安神養氣為主。張景岳

初生月內。多啼者。吉。胎熱胎毒胎驚。皆從此散。醫學入門

選案



葉時可先生。治一兒喪母憂啼。心煩不安。令服秘旨安神丸。以其母所着未浣裏衣覆其身。是夕神安而愈。余治一兒。墮池驚駭。發熱啼吵。用清心安神之劑。命汲池中水。煎藥服之而愈。雖曰以意治病。亦取其氣相感耳。

許宣洽

疖

一。眼青揉癢是肝疖。二。齒焦是骨疖。三。毛落鼻乾是肺疖。四。皮乾肉裂是筋疖。五。髮焦黃是血疖。六。舌上生瘡是心疖。七。愛喫泥土是脾疖。顧頌經

五臟疖傷。大抵然爾。析而論之。曰五疖。出蟲曰蛔疖。曰瘡疖。曰腦疖。曰乾疖。曰疖渴。曰疖瀉。曰疖痢。曰疖腫脹。

曰疳勞。曰無辜疳。曰丁奚。曰哺露。證狀不一。楊仁齋

小兒丁奚哺露客忤無辜。四異病也。大人陽易陰易百合狐惑。四奇病也。王好古

幼科疳疾。有丁奚哺露之名。雖係俗稱。卻有意義。丁奚者。言奚童枯瘦如丁也。主手足枯細言之。病在肉。脾疳也。哺露者。言愈哺之而骨愈露也。主解顱言之。病在骨。

腎疳也。醫參

疳者。乾也。小兒腸胃柔嫩。若乳食失調。肥甘不節。運化不及。停積發熱。熱久津乾。此因積成疳者也。或五臟偏熱。或因病後。或醫藥誤下。致亡津液。脾不輸化。積滯不行。此因乾致積者也。故五疳不離乎脾胃。治法。胃滯當



消。脾弱宜補。熱者用苦寒清火。冷者宜辛溫健運。有蟲者兼用殺蟲之品。虛者各隨本臟。補益其母。總宜丸劑。緩調。不能速功。或用雞肝。納入治疳藥。燉食。最爲有效。

臨證指南

凡疳在內者。則目腫腹脹。瀉痢青白。體漸瘦弱。疳在外者。則鼻下赤爛。頻揉鼻耳。肢體生瘡。大抵其證雖多。要不出於五臟。而五臟之疳不同。當各分辨治之。錢仲陽

疳疾不必分冷熱。惟辨其瀉不瀉耳。不瀉者。積熱無所發洩。故胸腹發熱特甚。瀉者。積熱有所發洩。故胸腹不甚熱。然其疾總由積熱而成。方書有冷疳之名。謬矣。慈

幼筏



小兒五疳。卽大人五勞。然旣云乾云勞。豈非精血敗竭之證乎。察前人諸法。俱從熱治。多用清涼。雖此證真熱者固多。而元氣旣敗。則假熱者尤多也。其或血氣俱損。有非大補不可者。陰虛假熱。脾敗腎虧。又有非溫補不可者。貴在臨證酌宜。仍當以虛損治法參用。庶得盡善。

景岳全書

無辜疳證。腦後有核如彈丸。若不速去。當損其命。此核初生。輒而不痛。中有蟲如米粉。得熱氣。日漸長大。蟲隨血氣流散。所有停畜。子母相生。侵蝕藏府。肌肉作瘡。或大便膿血。致令兒漸黃瘦。頭大髮豎。手足細弱。從茲夭折也。聖惠方



無辜。鳥名。啼時兩頷扇動。如瘰癧之項。小兒肝熱目暗。頸核纍纍。其狀相類。因以爲名。後人穿鑿。謂兒衣夜露不收。爲無辜鳥羽所落。感而成病。荒唐之甚。余用逍遙散加減。緩緩調理。愈者甚多。怡堂散記

五遲

五遲者。立遲。行遲。齒遲。髮遲。語遲是也。蓋腎主骨。齒者骨之餘。髮者腎之榮。若齒久不生。生而不固。髮久不生。生而不黑。皆胎弱也。良由父母精血不足。腎氣虛弱。不能榮養而然。若長不能立。立而骨軟。大不能行。行則筋軟。皆肝腎氣血不充。筋骨痿弱之故。有肝血虛。筋不榮。膝蓋不成。而手足拳攣者。有腎氣虛。髓不滿骨。骨不

能用。而足脛無力者。併用地黃丸爲主。齒遲加骨碎補。補骨脂。髮遲加龜版鹿茸何首烏。立遲加鹿茸桂附。行遲加牛膝鹿茸五加皮。語遲之因不一。有因妊母卒然驚恐。邪乘兒心而不能言者。有稟父腎氣不足而言遲者。有乳母五火遺熱。閉塞氣道者。有病後津液內亡。會厭乾涸者。亦有脾胃虛弱。清氣不升而言遲者。邪乘兒心。菖蒲丸。腎氣不足。地黃丸加遠志。閉塞氣道。加味逍遙散。津液內亡。七味白朮散。脾胃虛弱。補中益氣湯。若病久或五疳所致者。但補養脾胃爲主。張氏醫通

小兒二百六十日。則膝骨成。乃能行。期也。有數歲不能行者。稟受腎元不足也。夫骨屬腎。憑髓所養。腎氣有虧。



則不能充髓滿骨。故足弱不能行也。復有重幃深閉。不見風日。或終日懷抱。筋骨不舒。是以難行者。又有離胎多病。肝腎俱虛。肝虛則筋弱。腎虛則骨柔。而不能行者。復有過食肥甘。脾胃受傷。致成疴證。氣血日憊。而不能行者。隨證調治。亦有可復。馮楚瞻

顱頰經

五軟五硬

五軟者。手脚腰背頸軟是也。五硬者。手脚腰背頸硬是也。五冷者。手脚氣脣面冷是也。五縮者。手脚舌脣陰縮是也。五反者。眼脣舌項脚反是也。五緊者。咽喉口脣眼

睛手足陰囊緊是也。五陷者。顙門太陽眼眶胸下肩井陷是也。五腫者。手心人中舌頭陰莖膝脛腫是也。五喘者。痘瘡驚風吐瀉下利喘是也。五盲者。痘瘡驚風久疖久瀉久痢盲是也。不論何病。總是惡候。馮氏錦囊

頭軟者。腎主骨。天柱骨弱。乃臟腑骨脈皆虛。諸陽之氣不足。足少陰太陽經虛也。手足軟者。脾主四肢。乃中州之氣不足。不能營養四肢。故肉少皮寬。飲食不爲肌膚也。口軟者。口爲脾之竅。上下齦屬手足陽明。陽明主胃。脾胃氣虛。舌不能藏。而常舒出也。夫心主血。肝主筋。脾主肉。肺主氣。腎主骨。此五者。皆因所稟五臟之氣虛弱。不能滋養充達。以故骨脈不强。致令肢體痿軟。然其要。



總歸於胃。蓋胃者。水穀之海。五臟之本。六腑之大源也。治法必先以脾胃爲主。俱用補中益氣湯。以滋化源。兼服地黃丸。仍令壯年乳母哺之。多能全形。薛立齋五硬者。仰頭吸氣。難以動搖。氣壅作痛。連於胸膈。肢冷而硬。此陽氣不營於四末也。經曰。脾主四肢。又曰。脾主諸陰。今手足冷而硬者。獨陰無陽也。此證從肝脾二臟受患。治當補脾平肝。證治準繩

解顛顛脹顛陷顛填

小兒有解顛。顛不合。顛陷。三者大同小異。解顛者。謂兒年長。顛應合不合。頭顛開解也。蓋腎主骨。腦爲髓海。腎氣不盛。則髓海不足。故骨縫開解也。其顛不合。與顛陷。

雖因臟腑有熱。熱氣上衝所致。然亦本於腎氣不足也。

萬全方

腎主骨。骨氣實。則腦髓充。而顛早合。腎氣怯。則腦髓虛。而顛不合。此由父母精血不足。宜用地黃丸補之。若在乳下。當兼補其母。更以軟帛緊束其首。使其易合。顛填顛陷。亦因所稟腎氣不足。及乳哺失宜。脾胃虧損所致。夫脾主肌肉。氣逆上衝。而爲填脹。元氣下陷。而爲顛陷。並宜補中益氣湯。地黃丸。及用狗頭骨炙黃爲末。以雞子清調敷顛門。亦有因瀉利病後。氣血虧虛。不能上充者。亦用前法。若手足並冷。服前湯未應。此虛寒之甚也。急加附子。緩則不救。

薛立齋



顛脹。與顛填不同。顛門凸起。爲顛填。此屬心經火盛。錢氏用瀉心湯。顛脹。則頭皮光急。額角脹大。乃肝腎虛熱。上沖。治用地黃湯重劑以鎮之。○顛門不合。頭骨分開。名曰解顛。其兒面眊目白睛多。此由先天不足。治宜陰陽雙補。六味湯加鹿茸龜版。許宜洽

龜背龜胸

龜背者。由兒生下。風客於脊背。入於骨髓。治宜小續命湯。去附子加防風。龜胸者。因肺受風熱。攻於胸膈。治宜龜胸丸。並用龜尿點其骨節。多有得愈。若稟受肝腎虛熱者。宜用六味丸。腎氣不足者。宜用八味丸。背加鹿茸。胸加龜甲。治之貴早。遲則不驗。張氏醫通

予按龜胸有治。龜背乃不治之證。前人論治。猶有未善。雖曰客風入骨。坐早勞傷。咳嗽肺虛。然未窺其病源。無非以見在者言之也。凡小兒稟受真元足者。嘗見其赤身裸體。當風露坐。半週之後。坐以座欄。從未聞有客風入骨。坐早勞傷。嗽久而病龜背之說。此證蓋由稟父母精髓不足。命陽虧損者多有之。不觀小兒龜背。正在命門之間。漸次骨節浮露。其腰如弓。實因骨痿不能支撐之故。豈風邪爲患哉。前人強立松蕊丹。反用麻黃大黃獨活防風。一派攻伐之藥。適足以速其殤也。但當以六味加上桂鹿茸。救其先天。復以六君等。扶其胃氣。或可十中保一。陳飛霞

鶴節

小兒肌肉瘦薄。骨節呈露。如鶴之膝。此先天稟受精髓不充。亟以六味丸。加鹿茸牛膝治之。緩則必成廢疾。慈幼筏

天柱骨倒

天柱骨倒小兒。有體肥容壯。不爲瘦悴。孰知形體過肥。中氣愈弱。是盛於外。而歉於內也。○有因久病之後。或泄瀉日久。忽然頸項傾側。最爲危候。速救真元。十全大補湯加鹿茸。○有兒生下頸便軟者。胎氣不足也。由稟父之腎元虛敗。峻補先天。其庶幾矣。補腎地黄丸。與六君子湯。間服。○天柱骨倒。總係真陽大敗。爲小兒之惡

證。保救真元。是其大要。外以生筋散貼之。幼幼集成

魃病

魃病者。其狀微微下利。寒熱往來。毛髮擊擊。情思不悅。千金云。魃者。小兒鬼也。子未能行。母又有孕。令兒羸瘦。骨立髮稀。迺魃病也。先用紫霜圓。下其魃乳。後以益黃散補之。令兒斷乳即安。予謂婦人乳子。情意所關。腹既懷孕。生氣注胎。雖乳何益。淮南有言。男子蕪蘭。美而不芳。魃子得乳。萎而不澤。此真透達之言。鬼神之說。無足為據。速令斷乳為是。怡堂散記

小兒生後。其母又娠。令兒精神不爽。身體痿痺。名為魃病。用伏翼燒灰細研。以粥飲調下五分。日四五次。或炙



令香。熱嚼。哺兒亦效。伏翼。卽蝙蝠也。聖惠方

暖病

諺云。若要小兒安。常帶三分饑與寒。小兒純陽之體。不勝鬱遏。每見富貴之家。紅爐密室。疊帳重裯。醞釀成病。或睡時。母不加意。蒙頭蓋覆。氣不得泄。或繫於懷抱。外裹重綿。內蒸母氣。以致發熱面赤。心煩啼吵。此證旣非外感。亦非內傷。名曰暖病。醫家察得其情。但以輕清之劑。微微散之。仍令徐徐撤去過厚衣被。則熱證自平。小

兒諸熱辨

蛀夏

脾爲坤土。喜燥惡溼。凡脾胃不足者。遇長夏溼薄之令。



則不能升舉清陽。健運中氣。又值少陽相火之時。熱傷元氣。則體情脚弱。嗜臥發熱。精神不足。食少無味。呼吸短乏。視物暈暈。小便赤數。大便不調。名曰蛀夏。此稟賦陰虛。元氣不足之證。治用補中湯去升柴加黃蘗。若血虛者。用補血湯。氣血兩虛者。八珍湯。肝腎陰虧者。地黃丸。大便瀉者。理中湯。兒病多因母氣不調所致。當戒怒氣。調飲食。適寒溫。則可遠病。薛立齋

夏。火令也。火旺則金虧。故陰虛之人。多不耐夏。內熱食減。肌膚消爍。若蟲之蛀物焉。治法當於古方推之。熱傷氣。清暑益氣湯。是扶正氣以辟暑邪。火爍金。千金參麥湯。是保肺金以防火爍。水不勝火。參麥地黃湯。均爲對



證之藥。若不明其理。專治脾胃。脾胃之藥多燥。燥則土旺而水愈涸。病加甚者有之。此證。東垣薛氏皆云稟賦陰虛。元氣不足。令於平時預服地黃丸。以杜來歲之患。則善矣。小兒諸熱辨

睡中咬牙

小兒寤寐。不時咬牙及嚙乳者。雖多屬驚。然所致各有不同。若發熱飲水啼哭者。心經實熱也。宜瀉心湯。若睡困驚悸。合目而臥者。心經虛熱也。宜導赤散。若面青目劄。項強煩悶者。肝經實熱也。宜柴胡清肝散。若手循衣領。及亂捻物者。肝經虛熱也。若發搐目青面赤者。肝經風熱也。並宜六味丸。張氏醫通



夢中咬牙者。風熱也。由手足陽明二經。積熱生風。故令相擊而有聲也。必在夢中者。風屬陽。動則風行於陽。靜則風歸於裏也。○咬牙一證。惟痘疹見此爲危候。餘則皆無大害。亦有因病戰慄。鼓頷而鬪牙者。治其本證。則自止矣。幼幼集成

滯頤

滯頤之病。是小兒多涎。流出漬於頤間。涎者脾之液。脾氣虛冷。故涎自流。不能收制也。巢氏病源

按內經云。舌縱涎下。皆屬於熱。而此專屬脾冷。亦偏見也。張渙處冷熱各二方。爲得之。然以流出爲冷。不流出爲熱。恐亦未確。證治準繩



百晬嗽

凡乳子百日內有痰嗽者。謂之百晬嗽。或出胎暴受風寒。或浴兒爲風所襲。或解換襦裳。或出懷喂乳。而風寒得以乘之。此病由外來者。或乳汁過多。吞嚥不及而噎者。或啼哭未定。以乳哺之。氣逆而嗽者。此病由於內生者。皆能爲嗽。第汗下之劑。難以輕用。以其胃氣方生。不能勝藥故也。故曰難醫。予治此證甚多。先用荊防敗毒散二小劑。母子同服。更令乳母忌口。以清其乳。雖嗽至重。不過旬日自愈。幼幼集成

汗

小兒元氣未充。腠理不密。所以極易汗出。故凡飲食過

熱衣被過煖。皆能致汗。東垣諸公云。此是小兒常事。不必治之。然汗之根本。由於營氣。汗之啓閉。由於衛氣。小兒多汗。終是衛虛不固。汗出既多。未免營衛血氣有所虧損。而衰羸之漸。未必不由乎此。不可不治也。法當益氣爲主。但使陽氣外固。則陰液內藏。而汗自止矣。張景岳

虛羸

小兒虛羸。因於脾胃不和。不能乳食。故使肌膚瘦弱。或病後脾虛。不能運化穀氣所致。虛而寒者。時時下利。脣口淡白。虛而熱者。身體壯熱。肌肉微黃。更當審形色。察見證。如面赤多啼。心虛也。面青目劄。肝虛也。耳前後或耳下結核。肝經虛火也。頸間肉裏結核。食積虛熱也。面

黃痞滿。脾虛也。面白氣喘。肺虛也。目睛多白。腎虛也。仍參相勝治之。張氏醫通

病後瘖

小兒吐瀉。及大病後。雖有聲而不能言。此非失音。爲腎怯不能上接於陽故也。地黄丸主之。錢仲陽

癩發差後。不能言者。心之聲爲言。開竅於口。其癩發雖止。風冷之氣。猶滯心之絡脈。使心氣不和。其聲不發。故不能言也。巢氏病源

小兒驚風竝退。只是聲啞不能言。以天南星炮爲末。每服一字。豬膽汁調下。便能言語。證治準繩

兜乳

小兒吐乳。雖有寒熱之不同。然寒者多而熱者少。虛者多而實者少。總由胃弱而然。但察其形色脈證。則虛實寒熱。自有可辨。熱者宜加微清。寒者必須溫補。乳子之藥。不必多用。但擇其要者。二三四味。可盡其妙。如參薑飲。異功散之類。若兒小乳多。滿而溢者。亦是常事。乳行則止。不必治也。張景岳

小兒嘔吐。有寒。有熱。有傷食。其病總屬於胃。復有溢乳。嘔乳。嘔噦。更有寒熱拒格之證。又有蟲痛而吐者。皆當詳其證而治之。凡治小兒嘔吐。先宜節其乳食。嘔吐多渴。不可與水。水入復吐。終不能止。必強忍一二時。而後以米湯與之。吐自止矣。○初起嘔乳。卽當調治。如嘔不



已卽成吐。吐不已卽成嘔。嘔不已卽成噦。胃氣虛。精神脫矣。○凡嘔吐不納藥者。最難治療。蓋藥入卽吐。安能有功。不可強灌。胃口愈吐愈翻。予之治此頗多。先將薑湯和土。作二泥丸。塞其兩鼻。使之不聞藥氣。然後用對證之藥。煎好斟出。冷熱得中。止服一口。停之半時。再服一口。又停少頃。則任服不吐矣。愚人不知。明見其吐藥不納。偏強灌之。則一吐傾囊。又何藥力之可恃乎。此法不但幼科。方脈亦當識此。幼幼集成

吐瀉

小兒吐瀉。虛寒者居其八九。實熱者十中一二。但察其脈證無火。面色青白。氣息平緩。肢體清涼。或神氣疲倦。

則悉是虛寒。不得妄用涼藥。古云。脾虛則嘔。胃虛則吐。蓋飲食入胃。不能運化而吐者。此脾氣虛弱。所以不運也。寒涼入胃。惡心而吐者。此中焦陽氣受傷。所以不化也。若邪在中焦。則止嘔吐。連及下焦。則并爲瀉矣。故在中上二焦者。宜治脾胃。連及下焦者。宜調脾腎。若非實熱火邪。而妄用寒涼消伐者。無有不死。○小兒吐瀉并作者。本屬內傷。然有因寒氣外入。內犯臟氣而然者。有因生冷不慎。致傷胃氣而然者。有因中氣本弱。飲食失宜而然者。邪傷陽分則爲吐。邪傷陰分則爲瀉。若吐瀉並作。則陰陽俱傷。察其有滯無滯。辨其虛實而治之。張

景岳

醫

述

卷十四 雜病

七十三

中華書局印



長夏暑溼當令。脾土受病。暴感時行之氣。多有發熱吐瀉者。吐瀉裏證也。發熱表證也。口渴心煩。表裏俱病。黃連香薷飲。爲對證之藥。一服可平。再服可愈。庸俗不明此理。例用疏散消食通套之方。藥病不合。徒傷正氣。吐瀉不止。精神已困。額熱指冷。目陷神脫。雖名暑風。實與慢驚同類。更醫有見其額熱口渴。暑證猶在。而用黃連者。有見其發熱指冷。表證猶在。而用香薷者。不知吐瀉大作。胃氣暴傷。治法與初病不同。初病正氣未傷。可服黃連香薷飲。故一服而效。及待胃氣旣傷而始用。是用於不可用之時也。長夏秋初。小兒患此者。歲歲皆然。予前有參連飲之論。又有黃土稻花湯之論。皆屬後起之

功。點破機關。莫若黃連香薷飲。劈頭一服之爲愈也。格
堂散記

選案

余仲兒。生於五月。本年初秋。感寒發熱。脈微緊。素知其
臟氣屬陰。不敢清解。與蘇羌芷辛生薑之屬。冀散其寒。
一劑下咽。不惟發熱不退。反加大瀉。愈瀉愈喘。斯時謂
其寒氣盛耶。何以用溫藥而反瀉。謂其火刑金耶。豈以
清瀉連日。而尚堪寒涼。謂其表邪未除耶。何以不利於
疏散。束手無策。且見其表裏俱劇。大喘垂危。又豈輕劑
所能挽回。乃用人參二錢。生薑五片。煎汁半盞。未敢驟
進。挑與二三匙。懷之。旋走室中。察其呼吸進退。喘雖未



減。而亦不增。又與三四匙。少頃。鼻息少舒。遂與半鍾。更覺有應。復以人參二錢。如前煎湯。服完。氣息遂平。齣齣大睡。瀉止。熱亦退矣。所以然者。觀其因瀉反喘。豈非中虛。設有實邪。自當喘隨瀉減。紀此。以見溫中散寒之功。妙有如此。○余季子。生甫半週。余見新涼日至。虞裊禱之薄。恐爲寒侵。切囑眷屬保護。不以爲意。數日後。吐瀉大作。用溫胃和脾理中等劑。不效。加人參三錢。及薑桂。吳萸肉蔻。亦不效。至四五日。則隨乳隨吐。乃用人參五六錢。附子薑桂等各一二錢。下咽卽吐。所下之乳。白潔無氣。斯時形氣危矣。默測其故。且度其寒氣犯胃。而吐瀉不止。若舍參薑桂附。尚有何術。思其胃虛已極。藥之

氣味。略有不投。則胃不受。附子味鹹。亦能致嘔。必其故也。須得甘辣可口。庶胃氣可安。乃用胡椒三錢。煨薑一兩。人參二兩。分煎聽用。凡用參湯之十。椒薑湯之一。味微甘辣。正得可口。徐與經時。皆咽不吐。乳藥皆安。但瀉仍未止。參盡後。忽躁擾呻吟。家人皆怨。謂嬰兒嬌嫩臟腑。何堪此等熱藥。是必燒斷肚腸也。余雖疑之。而不爲亂。思此藥若果難堪。何午前相安。而遽變若此。其必數日不食。胃氣新復。倉廩空虛。饑甚則然也。旁有預備之粥。與一小盞。輒鯨吞虎噬。又望其餘。復與半碗。猶然不足。又與半碗。遂寂然安臥。次日。復加製附。瀉止全愈。○錢旭陽長郎。年兩週。季夏間。生冷傷脾。先瀉後痢。旭陽

善醫。知其傷於生冷。與參朮薑桂等藥。瀉痢不愈。漸至唇口生瘡。謀之余曰。此兒明爲生冷所傷。今不利溫藥。奈何。余曰。此因瀉傷陰。兼之辛辣遽入。而虛火上炎耳。非易附子。不能使火歸原。因用二劑。口瘡咽腫倍甚。見於頭面。又謀之余曰。用藥不投。豈真因溼生熱耶。余診之曰。上之脈息。下之所出。皆非真熱。溫之不效。雖屬可疑。然究其所歸。寒之則死。意者藥猶未及耳。旭陽曰。尚有一證。似屬真寒。今其所飲。必欲極熱。余等不能入口。彼則安然吞之。卽其喉口腫痛。所不顧也。余曰。是矣。復增附子及薑桂肉果人參熟地之屬。其瀉漸止。喉口等證。不日全收。疑似之間。難辨如此。非有確見。萬無一生。

張景岳

驚痢

每見驚與痢齊作者。竟不能救。間有驚定熱退。而後痢作者。又在可治之例。又有痢後作驚者。此脾土敗壞。肝木生風。亦不治之證。怡堂散記

選案

一兒三歲。秋杪。驚後患痢。日夜百度。發熱。米粒不進。此噤口也。况在驚後。勢不可爲。不得已。用木鼈子合臍法。逾時。稍能食粥。方用參朮苓草歸芍香連。服藥二劑。痢減。食加。再以石蓮石脂白頭翁等味出入。去參則食少。去連則痢多。二物竟不能除。守服旬日而愈。予所治驚



後痢。皆不得起。不意此子竟得成功。雖賴參力。亦由驚定而後痢作。稍有不同。許宣洽

食積

小兒食積。多因脾虛。乳食不化。久而成積。其證夜熱朝涼。或寒熱并作。腹痛嘔酸。喜睡神昏。大便酸臭。蓋脾爲至陰之藏。故凡脾病者。至夜必熱。熱而兼寒。則又見所勝者侮所不勝矣。食未消者消之。食既消者補之。若手足冷。喜熱飲者。此中州虛寒也。宜溫之。大便欲去不去者。脾氣下陷也。宜升之。若夜間或晨瀉者。脾腎俱虛也。四神丸主之。若手足熱。作渴飲水者。脾胃實熱也。瀉黃

散主之。張氏醫通



傷風

小兒傷風。鼻塞發熱。多因乳母鼻吹顙門所致。治宜內服惺惺散。外用葱頭七莖。生薑一片。細切搗爛。攤於紙上。掌中合溫。貼於顙門。其邪即解。乃去其葱。另用絹緞寸餘。塗以麵糊。仍貼顙門。永可杜患。張氏醫通

風痰

風痰一證。乳兒最多。四時皆有。大概冬春之交宜溫散。荆防甘桔橘半生薑杏仁蘇子之類。夏令宜清散。杏仁牛蒡梔子之類。秋令宜清潤。枳殼栝萋之類。冬令嚴寒。有用麻黃湯而解者。肺為嬌臟。總宜疏解。不得妄投丸散。○肺雖喜潤。然胃中溼痰宜燥。小兒乳膩生痰。外證



有鼻水多涕淚。二陳湯爲治痰總劑。合之前胡桔梗荆防蘇子枳殼麥芽杏仁之類。或加生薑葱白。結者散之。保赤之善也。許宣洽

結胸

結胸一證。幼科本無是名。由仲景傷寒論中。有下早。表邪入裏。則爲結胸。亦有熱已入裏。失下而成結胸者。病在臍之上。滿而拒按。此陽明胃腑證也。結有輕重。故有大小結胸之辨。若近世幼科之所謂結胸者。乃肺中痰熱結聚。非胃腑之病也。蓋肺爲五臟華蓋。上通於鼻。外合皮毛。其兒本有痰熱。復感風寒。肺氣外不得通。內何由化。以致發熱咳嗽。痰鳴喘築。甚至鼻扇口張。面青目

直。此皆表氣未開故也。予治冬令嚴寒。有用麻黃湯而解者。有用薑蘇飲而散者。三時則用暢肺飲加減。一切金石之品。概置不用。故於結之未甚者。十保十全。若已經庸手。及服過金藥化痰丸等。則解散爲艱。胃氣強者。尚能旋轉五六。惟肺爲降利之藥所逼。鎮墜之性所壓。提之不動。膠固不開。肺旣填實。金頑不靈。肝木無制。而驚風作矣。醫又不知從肺治。更用鎮驚之劑。愈遠愈離。從無一活。是皆醫家未究結胸之原。由於肺氣之壅閉。婦女見兒痰甚。視丸散爲至寶。甘受其誤而不悟。良可扼腕。許宣洽

風温



風溫者。春月受風。其氣已溫。經謂春氣者。病在頭。治在上焦。肺位最高。邪必先傷。此手太陰氣分先病。失治則入手厥陰心包絡。血分亦傷。幼科見其身熱咳嗽。不知肺病在上之旨。妄投荆防柴葛。加入枳朴杏蘇。葡萄子。大麥廣皮之屬。輒云解肌消食。有見痰喘。便用滾痰丸。大便數行。上熱愈結。幼穉穀少胃薄。表裏苦辛化燥。胃汁已傷。復用苦降丸藥。以致脾胃陽和傷極。陡變驚癇。莫救。○按風溫肺病。治在上焦。夫風溫忌汗。初病宜用辛涼。若雜入消導發散。不但與肺病無涉。且劫盡胃汁。肺乏津液。上供頭目。清竅爲熱氣熏蒸。鼻乾目瞑。上竄無淚。或熱深肢厥。狂躁溺瀼。胸高氣促。皆是肺氣不宣化。

之徵。斯時若以肺藥少加清降。使藥力不致直趨腸中。則上痺可開。諸竅自爽。無如庸醫僉云結胸。雜用連萸柴枳。苦寒直降。致閉塞愈甚。告斃甚多。○按此證初時發熱喘嗽。首用辛涼。清肅上焦。如薄荷連翹牛蒡象貝桑葉沙參梔仁萹皮花粉之屬。若色蒼熱甚煩渴。用石膏竹葉辛寒清散。若日數漸多。邪不得解。芩連涼膈。亦可選用。倘熱邪逆傳膈中。神昏目瞑。全無涕淚。諸竅欲閉。其勢危急。必用至寶丹。或牛黃丸。若病後餘熱。只宜甘寒清養胃陰足矣。臨證指南

夏熱

暑熱一證。古人以白虎湯爲主方。後賢劉河間謂溫熱



時邪。當分三焦投藥。以苦辛寒爲主。若拘六經分證。仍是傷寒治法。致誤多矣。蓋傷寒外受之寒。治從汗解。口鼻吸入之寒。治當溫裏。論幼稚病暑熱。時下不外發散消導。加入香薷。或六一散。但暑必兼溼。暑傷氣分。溼亦傷氣。汗則耗氣傷陽。胃汁受劫。變病甚多。發泄司令。裏真自虛。張鳳達云。暑病首用辛涼。繼用甘寒。再用酸泄酸斂。不必用下。可稱要言不煩。臨證指南

秋燥

秋深初涼。稚年發熱咳嗽。證似春月風溫。但溫乃漸熱之稱。涼卽漸冷之意。春令爲病。猶是冬藏固密之餘。秋令感傷。恰值夏熱發泄之後。然雖體質虛實不同。而溫

自上受燥。自上傷。理亦相等。均是肺氣受病。世人誤認。暴感風寒。混投三陽發散。津劫燥甚。喘急告危。若果暴涼外束。身熱痰嗽。宜葱豉湯。或蘇梗前胡杏仁枳桔。投一二劑亦可。粗工亦知燥熱爲病。與瀉白散。加芩連之屬。不知苦愈助燥。必增他變。當以辛涼甘潤。燥氣自平。○秋燥一證。氣分先受。治肺爲急。若延纏日久。病入血分。又非輕浮肺藥可醫。須審體質證端。古謂治病須活潑潑地。如盤走珠耳。臨證指南

選案

翁姓子。生數月。證患秋燥。潮熱咳嗽如瘧。幼科發散不效。忙令禁乳。更醫用瀉白散。加芩連。晝夜煩熱。喘而不



咳。下利粘膩。藥後。竟利藥水。余曰。稚年以乳食爲命。餓則胃虛氣餒。肺更不爽。乃與玉竹甘草廣皮竹葉心。一劑熱緩。與粳米南棗甘草沙參二劑。與乳并進。令其豎抱勿倒。三日全愈。臨證指南

冬寒

深秋入冬暴冷。折傷外感。發熱頭痛。身痛嘔惡。治從太陽。風傷衛。用桂枝法。寒傷營。用麻黃法。小兒肌疏易汗。難任麻桂重表。輕則紫蘇防風。身痛用羌活。然不過一劑。傷風亦肺病爲多。前杏枳桔之屬。辛勝卽是汗藥。其葱豉湯。乃通用要方。若肢冷寒戰。嘔吐自利。或身無熱。卽從中寒裏證。治分三陰。但小兒太陰中寒證多。厥陰

間有。若冬令應寒。氣候溫煖。當藏反泄致病。名曰冬溫。溫爲欲熱之漸。非寒證得汗可解。若涉表邪一二。裏熱必兼七八。是癰疹丹沙。非徒風寒一途。或外受之邪。與裏邪相薄。亦令鬱於經絡。或飲醇厚味。裏熱熾烈。而衛不與營和。或不正之氣內侵。卽有腹痛下利諸證。治法以裏證爲主。稍兼清散。設用辛溫。禍不旋踵。臨證指南

附方

柴胡梅連散

柴胡

前胡各三錢 胡黃連

烏梅各一錢

右㕮咀。每一錢。童便一盞。豬肚一枚。豬脊髓一條。韭根白半錢。同煎。不拘時。溫服。



暑風飲子 治暑風急驚。

防風

柴胡

香薷

連翹

赤苓

半夏

鉤藤鉤

石膏

扁莢葉

甘草

風勝加羌活。熱勝。舌如楊梅加黃連。小便不利加木通。人事昏迷加鮮菖蒲。

大青膏 治傷風吐瀉。

青黛

天麻各一錢 硃砂

乾蝎

白附子各五分

天竺黃

烏稍蛇肉各一錢

麝香二分

各為細末。蜜和成膏。薄荷湯化服。每一小豆許。

鉤藤飲



人參

犀角各五分全蝎

天麻各二分

甘草一分

鉤藤一錢

蟬蝎散

慢驚。陽證尚在。宜用此方。

蟬蛻二十一箇

全蝎七箇

南星一箇

甘草二分半

為末。每用一錢。薑棗水煎服。

醒脾散 治脾困昏沈。吐瀉不止。漸成慢驚。

人參

白朮

茯苓

甘草

白附子

天麻

殭蠶

木香各五分

全蝎二分半

右為粗末。每用二錢。薑棗水煎服。

烏蝎散

治慢驚純陰證。吐瀉不止。



人參

白朮

茯苓

炙甘草

南星

川烏

全蝎

同剉粗末。薑棗水煎服。

黃土稻花湯

治暑風吐瀉。將成慢驚。

黃土一兩

稻花一合

人參五分

陳皮四分

半夏五分

茯苓七分

甘草二分

烏梅肉五分

新汲水攪黃土。澄清。煎藥。湯熟。入稻花。再煎數沸。溫

服。如無稻花。以生穀芽代之。

蒿蟲丸 治急驚神效。

硃砂

輕粉各一錢

右爲細末。取青蒿節內蟲。同研。丸如麻子大。曬乾。磁



罐收貯。一歲一丸。人乳化服。

蒿蟲須七月初旬取。遲則生翅飛去。

紫霜丸

治驚積。

代赭石二錢

杏仁二十一箇

巴豆二十一粒

爲末。飯丸。粟米大。每服五七丸。煎皂角仁湯下。

豬心湯

治小兒癩證。

用甘遂末一錢。豬心一箇。批作兩片。入甘遂末藥在內。線縛。溼紙包裹。文武火煨熟。取藥。細研。入辰砂末一錢。和勻。分作四丸。每服一丸。豬心湯化下。神效。

紫河車丸

治先天不足。癩證頻發。

紫河車。卽小兒胞衣。肥厚者一箇。洗淨。重湯蒸爛。研入人參當歸末。和勻爲丸。如芡實大。每服五六丸。乳

汁化下。

摩藥 治小兒客忤。

用豆豉數合。水拌令溼。搗熟。丸如雞子大。先摩兒額頂。足心。各五六遍。再摩心口及臍。摩之食頃。破視丸中。有細毛爲驗。擲丸道中。痛卽止。

花火膏 治夜啼。

燈花 一顆

右塗乳上。命兒吮之。

蟬花散

用蟬退下半截爲末。一字。薄荷湯。入酒少許。調下。其啼卽止。若用上截。卽復啼。

布袋丸 治小兒丁奚哺露無辜疳。

人參

白朮

茯苓

甘草

蘆薈各五錢 夜明砂 使君子 蕪荑各二兩

共爲末。蒸餅糊丸。曬乾。每粒約重三錢。日用一九。布袋盛之。另切精豬肉二兩。同煮汁服。肉亦可食。其袋取起。懸掛風處。一九可煮數次。

蟾蜍丸 治無辜疳。

大蟾蜍 一枚

先取糞蛆一杓。置木桶中。以尿浸之。卻將蟾蜍跌死。投與蛆食。一晝夜。用布袋盛蛆。置急流水中。一宿取出。瓦上焙乾爲末。入麝香一字。粳米飯丸。麻子大。每



服二三十丸。米飲下。其效如神。

雞肝藥 治疳疾。

雞肝一具 雄黃

牛黃各半分

先將雞肝剖開。取二黃藥末。放于肝內。合好。再用酒釀半鍾。將雞肝浸酒釀內。隔湯燉熟。曬乾研末。調服。或就熱啖食。亦可。

七味白朮散 治小兒吐瀉。或病後津液不足。口乾作渴。

人參

白朮

茯苓

炙甘草

木香

藿香各一錢 乾葛二錢

右爲末。每服一二錢。水煎。



塗額法

用龍骨。醋磨濃汁。攤青絹上。焙溫。緊束頭顱。一日一換。

龜背丸

麻黃

防風

獨活

前胡

當歸

大黃

枳殼各三錢

右爲細末。糊丸。黍米大。每服十五六丸。食後米湯下。

龜胸丸

大黃七錢半天冬

百合

杏仁

木通

桑白皮

甜葶藶

朴硝各五錢

右爲細末。蜜丸。菉豆大。溫水研服五丸。量兒大小加



卷十四 雜病 八十五 中華書局印

減。

溫脾丹 治脾冷多涎。

丁香

木香

半夏各一兩白朮

青皮

乾薑各半兩

右味搗為細末。蜜丸。黍米大。每服十粒。米飲下。

金硃丹 治脾熱多涎。

金箔

硃砂

半夏

南星各一兩茯苓

石膏各半兩

右味細研。薑汁和丸。黍米大。每服十粒。人參湯下。

汪廣期擬方 治食積日久。

五穀蟲

鍋焦粉



又方 外感鼻塞。咳嗽。肺受風邪。宜之。

前胡

杏仁

桔梗

甘草

又方 發熱頭痛。宜解表。

秦艽

甘草

菊花

生薑

此方。寒家得之。程敬通先生。治西門汪大有家小兒。
風溫湯 治春月傷風。發熱汗多。不可妄散。

玉竹

料豆

甘草

此方百益先生。及先大人常用。

至寶丹

犀角

硃砂

雄黃

琥珀

水安息香膏

玳瑁各一兩龍腦

麝香各一錢



牛黃五錢 金銀箔各十五片

爲極細末。將安息香膏。重湯煑。入諸藥研和。分作百丸。蠟包。臨服剖開。參湯化下。

牛黃丸

牛黃二錢半 硃砂

鬱金

丹皮各三錢 冰片

生甘草各一錢

蜜丸。新汲水化下。

醫述卷十四終